

UdakashAnti Mantra

॥ उदकशान्ति मन्त्रः ॥

ॐ

ब्रह्मजज्ञानं प्रथमं पुरस्तात् विसीमतस्सुरुचो वेन आवः ।
सबुधिया उपमास्यविष्ठः सतश्च योनिमसत्स्वविवः ॥

आपो वा इदं सर्वं विश्वा भूतान्यापः प्राणा वा आपः
पशव आपोऽन्नमापोऽमृतमापः सम्राडापो विराडापः
स्वराडापश्छन्दास्यापो ज्योतीष्यापो
यजूष्यापस्सत्यमापस्सर्वा देवता आपो
भूर्भुवस्सुवराप ओं ॥

अपः प्रणयति । श्रद्धावा आपः ।
श्रद्धां एवारभ्य प्रणीय प्रचरति
अपः प्रणयति । यज्ञो वै आपः ।
यज्ञं एवारभ्य प्रणीय प्रचरति
अपः प्रणयति । वज्रो वै आपः ।
वज्रमेव भ्रातृव्येभ्यः प्रहृत्य प्रणीय प्रचरति ।
अपः प्रणयति । आपो वै रक्षोघ्नीः ।
रक्षसां अपहत्यै ।
अपः प्रणयति । आपो वै देवानां प्रियंधाम ।
देवानामेव प्रियंधाम प्रणीय प्रचरति ।
अपः प्रणयति । आपो वै सर्वा देवताः ।
देवता एवारभ्य प्रणीय प्रचरति ।
आपोवैशान्ताः । शान्ताभिरेवास्य शुचश्शमयति ॥

देवो वस्सविता उत्पुनातु । अच्छिद्रेण पवित्रेण । वसोः सूर्यस्य रश्मिभिः ।
स हि रत्नानि दाशुषै सुवाति सविता भगः । तं भागं चित्रमीमहे ॥

ॐ

अग्निमीळे पुरोहितं यज्ञस्य देवमृत्विजम् । होतां रत्नधातमम् ॥
इषेत्वोर्जे त्वा वायवस्थोपायवस्थ देवो वः सविता प्रार्पयतु श्रेष्ठतमाय कर्मणे ॥
अग्न आयाहि वीतये गृणानो हव्यदातये । निहोता सत्सि बर्हिषि ॥
शन्नो देवीरभिष्टय आपो भवन्तु पीतये । शंयो रभिस्रवन्तु नः ॥

कृणुष्व पाजः प्रसितिन्न पृथ्वीं याहि राजेवामवा इमेन ।
 तृष्णीमनु प्रसितिं दूणानोऽस्ताऽसि विध्य रक्षसस्तपिष्ठैः ॥
 तव भ्रमास आशुया पतन्त्यनु स्पृश धृषता शोशुचानः ।
 तपूष्यग्ने जुह्वा पतङ्गानसन्दितो वि सृज विष्वगुल्काः ॥
 प्रति स्पशो वि सृज तूणितमो भवा पायुर्विशो अस्या अदब्धः ।
 यो नो दूरे अघशसो यो अन्त्यग्ने माकिष्टे व्यथिरादधर्षीत् ॥
 उदग्ने तिष्ठ प्रत्याऽऽतनुष्व न्यमित्रा ओषतात् तिग्महेते ।
 यो नो अरातिः समिधान चक्रे नीचा तं धक्ष्यतसं न शुष्कम् ॥
 ऊर्ध्वो भव प्रति विध्याध्यस्मदाविष्कृणुष्व दैव्या न्यग्ने ।
 अव स्थिरा तनुहि यातुजूनं जामिमजामिं प्र मृणीहि शत्रून् ॥
 स ते जानाति सुमतिं यविष्ठ य ईवते ब्रह्मणे गातुमैरत् ।
 विश्वान्यस्मै सुदिनानि रायो दुम्नान्यर्यो वि दुरो अभि द्यौत् ॥
 सेदग्ने अस्तु सुभगस्सुदानुर्यस्त्वा नित्येन हविषा य उक्थैः ।
 पिप्रीषति स्व आयुषि दुरोणे विश्वेदस्मै सुदिना सार्सद्विष्टिः ॥
 अर्चामि ते सुमतिं घोष्यर्वाक् सन्ते वावाता जरतामियं गीः ।
 स्वश्वास्त्वा सुरथा मर्जये मास्मे क्षत्राणि धारयेरनु दून् ॥
 इह त्वा भूर्या चरे दुपत्मन्दोषावस्तर्दी दिवा समनु दून् ।
 क्रीडन्तस्त्वा सुमनसस्सपेमाभि दुम्ना तस्थिवा सो जनानाम् ॥
 यस्त्वा स्वश्वास्सु हिरण्यो अग्न उपयाति वसुमता रथेन ।
 तस्य त्राता भवसि तस्य सखा यस्त आतिथ्यमानुषग जुजोषत् ॥
 महो रुजामि बन्धुता वचोभिस्तन्मा पितुर्गोतमादन्विषाय ।
 त्वन्नो अस्य वचसश्चिकिद्धि होतर्यविष्ठ सुक्रतो दमूनाः ॥
 अस्वप्नजस्तरणयस्सुशेवा अतन्द्रासोऽवृका अश्रमिष्ठाः ।
 ते पायवस्सध्रियञ्चो निषद्याग्ने तव नः पान्त्वमूर ॥
 ये पायवो मामतेयन्ते अग्ने पश्यन्तो अन्धन्दुरितादरक्षन् ।
 ररक्ष तान्तसुकृतो विश्ववेदा दिप्सन्त इद्विषवो नाह देभुः ॥
 त्वया वयः सधन्यस्त्वोतास्तव प्रणीत्याश्याम वाजान् ।
 उभा शसा सूदय सत्यतातेऽनुष्ठुया कृणुह्यहयाण ॥
 अया ते अग्ने समिधा विधेम प्रति स्तोमः शस्यमानं गृभाय ।
 दहाशसो रक्षसः पाह्यस्मान्द्रुहो निदो मित्रमहो अवद्यात् ॥
 रक्षोहणं वाजिनमाऽऽजिधर्मि मित्रं प्रथिष्ठमुपयामि शर्म ।
 शिशानो अग्निः क्रतुभिस्समिद्धस्स नो दिवा स रिषः पातु नक्तम् ॥
 विज्योतिषा बृहता भोत्यग्निराविर्विश्वानि कृणुते महित्वा ।
 प्रादेवीर्मायास्सहते दुरेवाः शिशीति शृङ्गे रक्षसे विनिक्षे ॥
 उत स्वानासो दिविषन्त्वग्नेस्तिग्मायुधा रक्षसे हन्त वा उ ।
 [मदे चिदस्य प्ररुजन्ति भामा न वरन्ते परिबाधो अदेवीः ॥]

(The line in [] is usually not chanted for auspicious occasions and is included for completeness.)

इन्द्रो वो विश्वतस्परि हवामहे जनेभ्यः । अस्माकमस्तु केवलः ।
इन्द्रन्नरो नेमधिता हवन्ते यत्पाया युनजते धियस्ताः ।
शूरो नृषाता शवसश्चकान आ गोमति व्रजे भजा त्वन्नः ।
इन्द्रियाणि शतक्रतो या ते जनेषु पञ्चसु । इन्द्र तानि त आ वृणे ।
अनु ते दायि मह इन्द्रियाय सत्रा ते विश्वमनु वृत्रहत्यै ।
अनु क्षत्रमनु सहो यजत्रेन्द्र देवेभिरनु ते नृषह्यै ।
आ यस्मिन्त्सप्त वासवास्तिष्ठन्ति स्वारुहो यथा ।
ऋषिर्ह दीर्घश्रुत्तम इन्द्रस्य घर्मो अतिथिः ।
आमासु पक्वमैरय आसूर्यः रोहयो दिवि ।
घर्मन्न सामन्तपता सुवृक्तिभिर्जुष्टं गिर्वेणसे गिरः ।
इन्द्रमिद्गाथिनो बृहदिन्द्रमर्केभिरर्किणः । इन्द्रं वाणीरनूषत ।
गायन्ति त्वा गायत्रिणोऽर्चन्त्यर्कमर्किणः ।
ब्रह्माणस्त्वा शतक्रतुवुद्धं शमिव येमिरे ।
अहोमुचे प्र भरेमा मनीषा मोषिष्ठदाब्ने सुमतिं गृणानाः ।
इदमिन्द्र प्रति हव्यं गृभाय सत्याः सन्तु यजमानस्य कामाः ।
विवेष यन्मा धिषणा जजान स्तवै पुरा पायादिन्द्रमहः ।
अहसो यत्र पीपद्यथा नो नावेव यान्तमुभये हवन्ते ।
प्र सम्राजं प्रथममध्वरणाम हो मुचं वृषभं यज्ञियानाम् ।
अपान्नपातमश्विना हयन्तमस्मिन्नर इन्द्रियं धत्तमोजः ।
वि न इन्द्र मृधो जहि नीचा यच्छ पृतन्यतः ।
अधस्पदन्तमी कृधि यो अस्मा अभिदासति ।
इन्द्र क्षत्रमभि वाममोजोऽजायथा वृषाभ चर्षणीनाम् ।
अपानुदो जनममित्र यन्तमुरुं देवेभ्यो अकृणोरु लोकम् ।
मृगो न भीमः कुचरो गिरिष्ठाः परावतः आ जगामा परस्याः ।
सुकं सशायं पविमिन्द्र तिमं विशत्रून् ताढि विमृधो नुदस्व ।
वि शत्रून् वि मृधो नुद वि वृत्रस्य हनू रुज ।
विमन्युमिन्द्र भामितोऽमित्रस्याभिदासतः ।
त्रातारमिन्द्रमवितारमिन्द्र हवे हवे सुहव शूरमिन्द्रम् ।
हुवे नु शक्रं पुरुहूतमिन्द्र स्वस्ति नो मघवा धात्विन्द्रः ।
मा ते अस्याः सहसावन् परिष्टावधाय भूम हरिवः परादै ।
त्रायस्व नोऽवृकेभिर्वरुथेस्तव प्रियासस्सूरिषु स्याम ।
अनवस्ते रथमश्वाय तक्षन् त्वष्टा वज्रं पुरुहूत द्युमन्तम् ।
ब्रह्माण इन्द्र महयन्तो अर्कैरवर्धयन्नहये हन्त वा उ ।

वृष्णे॒ यत् ते॒ वृष्णो॑ अ॒र्कम॑र्चा॒निन्द्र॒ ग्रावा॑णो अदि॒तिस्स॒जोषा॑ः ।
अ॒न॒श्वा॒सो ये॒ प॒वयो॑ऽर॒था इन्द्रे॑षिता अ॒भ्यव॑र्तन्त॒ दस्यून् ।

यत् इन्द्र॑ भ॒याम॑हे॒ ततो॑ नो॒ अभ॑यं कृधि ।
म॒घव॑न्छृ॒ग्धि तव॑ तन्न॑ ऊ॒तये॑ वि॒द्विषो॑ वि॒मृधो॑ जहि ।
स्व॒स्ति॒दा वि॒शस्प॑तिर्वृ॒त्रहा॑ वि॒मृधो॑ व॒शी ।
वृ॒षेन्द्राः॑ पु॒र ए॒तु नः॑ स्व॒स्ति॒दा अ॒भय॑करः ।
म॒हा॑ इन्द्रो॒ वज्र॑बाहुः॒ षोड॑शी श॒र्म य॑च्छतु ।
स्व॒स्ति नो॑ म॒घवा॑ करोतु॒ हन्तु॑ पा॒प्मानं॑ यो॒ऽस्मान् द्वेष्टि॑ ।
स॒जोषा॑ इन्द्र॑ स॒गणो॑ म॒रुद्भिस्सोमं॑ पिब॒ वृत्र॑ह॒ञ्छर॑ वि॒द्वान् ।
ज॒हि शत्रू॑र॒प॒मृधो॑नु॒दस्वा॑अ॒थाभ॑यं कृणु॒ हि वि॒श्वतो॑ नः ।

ये दे॒वाः पु॒र॒स्सदो॑ऽग्नि॒ नैत्रा॑ र॒क्षो॒ह॒ण॒स्तेनः॑ पा॒न्तु
ते नो॑ऽवन्तु॒ तेभ्यो॑ नम॒स्तेभ्यः॑ स॒वाहा॑
ये दे॒वा दक्षि॑ण॒सदो॑ य॒मनै॑त्रा र॒क्षो॒ह॒ण॒स्तेनः॑ पा॒न्तु
ते नो॑ऽवन्तु॒ तेभ्यो॑ नम॒स्तेभ्यः॑ स॒वाहा॑
ये दे॒वा प॒श्चात् स॒दो॒स॒वितृ॑ नै॒त्रा र॒क्षो॒ह॒ण॒स्तेनः॑ पा॒न्तु
ते नो॑ऽवन्तु॒ तेभ्यो॑ नम॒स्तेभ्यः॑ स॒वाहा॑
ये दे॒वा उ॒त्तर॑स॒दो व॒रु॒णने॑त्रा र॒क्षो॒ह॒ण॒स्तेनः॑ पा॒न्तु
ते नो॑ऽवन्तु॒ तेभ्यो॑ नम॒स्तेभ्यः॑ स॒वाहा॑
ये दे॒वा उ॒परि॑ष॒दो बृ॒हस्प॑ति॒नैत्रा॑ र॒क्षो॒ह॒ण॒स्तेनः॑ पा॒न्तु
ते नो॑ऽवन्तु॒ तेभ्यो॑ नम॒स्तेभ्यः॑ स॒वाहा॑ऽग्नये॑ र॒क्षो॒घ्ने स्वाहा॑ य॒माय॑ र॒क्षो॒घ्ने स्वाहा॑
स॒वि॒त्रे र॒क्षो॒घ्ने स्वाहा॑ व॒रु॒णाय॑ र॒क्षो॒घ्ने स्वाहा॑ बृ॒हस्प॑तये॒ दुव॑स्पते र॒क्षो॒घ्ने स्वाहा॑ ।

अ॒ग्निरा॒युष्मान्त्स॑ व॒नस्प॑ति॒भिरा॒युष्मान्ते॑न॒ त्वाऽऽयु॑षाऽऽयु॒ष्मन्तं॑ करोमि ।
सोम॑ आ॒युष्मान्त्स॑ ओष॒धीभिरा॒युष्मान्ते॑न॒ त्वाऽऽयु॑षाऽऽयु॒ष्मन्तं॑ करोमि ।
य॒ज्ञ आ॒युष्मान्त्स॑ दक्षि॒णाभिरा॒युष्मान्ते॑न॒ त्वाऽऽयु॑षाऽऽयु॒ष्मन्तं॑ करोमि ।
ब्र॒ह्मा॒युष्म॑त्तद् ब्रा॒ह्मणै॑रा॒युष्म॑तेन॒ त्वाऽऽयु॑षाऽऽयु॒ष्मन्तं॑ करोमि ।
दे॒वा आ॒युष्म॑न्त॒स्तेऽमृ॑तेना॒युष्म॑न्त॒स्तेन॑ त्वाऽऽयु॑षाऽऽयु॒ष्मन्तं॑ करोमि ।

या वा॑मिन्द्रा व॒रुणा॑ य॒तव्या॑ त॒नूस्त॑येमम॑ ह॒सो मु॑च॒तं ।
या वा॑मिन्द्रा व॒रुणा॑ स॒हस्या॑ त॒नूस्त॑येमम॑ ह॒सो मु॑च॒तं ।
या वा॑मिन्द्रा व॒रुणा॑ र॒क्षस्या॑ त॒नूस्त॑येमम॑ ह॒सो मु॑च॒तं ।
या वा॑मिन्द्रा व॒रुणा॑ ते॒जस्या॑ त॒नूस्त॑येमम॑ ह॒सो मु॑च॒तं ।

यो वा॑मिन्द्रा व॒रुणा॑व॒नौ स्राम॑स्तं वा॒मि॒तेनाव॑ य॒जे

यो वामिन्द्रा वरुणा द्विपात्सु पशुषु सामस्तं वामितेनाव यजे
 यो वामिन्द्रा वरुणा चतुष्पत्सु पशुषु सामस्तं वामितेनाव यजे
 यो वामिन्द्रा वरुणा गोष्ठे सामस्तं वामितेनाव यजे
 यो वामिन्द्रा वरुणा गृहेषु सामस्तं वामितेनाव यजे
 यो वामिन्द्रा वरुणाप्सु सामस्तं वामितेनाव यजे
 यो वामिन्द्रा वरुणौषधीषु सामस्तं वामितेनाव यजे
 यो वामिन्द्रा वरुणा वनस्पतिषु सामस्तं वामितेनाव यजे ॥

अग्नेयशस्विन्यशसे ममप्येन्द्रावतीमपचितीमिहावह ।
 अयं मूर्धा परमेष्ठी सुवर्चास्समानानामुत्तमश्लोको अस्तु ॥
 भद्रं पश्यन्त उपसेदुरग्रे तपो दीक्षामृषयः सुवर्चिदः ।
 ततः क्षत्रं बलमोजश्च जातं तदस्मै देवा अभि सन्नमन्तु ॥
 धाता विधात परमोतसंधृक् प्रजापतिः परमेष्ठी विराजा ।
 स्तोमाश्छंदांसि निविदोम आहुरेतस्मै राष्ट्रमभिसन्नमाम ॥
 अभ्यावर्तध्वमुपमेतसाक मयः शास्ताऽधिपतिर्वो अस्तु ।
 अस्य विज्ञानमनुसं रभध्वमिमं पश्चादनु जीवाथ सर्वे ॥
 ॥ राष्ट्रभृतं ॥

ऋताषाडुतधामाग्निगन्धर्वस्स इदं ब्रह्मक्षत्रं पातु तस्मै स्वाहा ।
 तस्यौषधयोऽप्सरस ऊर्जो नाम ता इदं ब्रह्मक्षत्रं पातु ताभ्यः स्वाहा ।
 संहितो विश्वसामा सूर्यो गन्धर्वः स इदं ब्रह्मक्षत्रं पातु तस्मै स्वाहा ।
 तस्य मरीचयोऽप्सरस आयुवो नाम ता इदं ब्रह्मक्षत्रं पातु ताभ्यः स्वाहा ।
 सुष्मनः सूर्यरश्मिश्चन्द्रमा गन्धर्वः स इदं ब्रह्मक्षत्रं पातु तस्मै स्वाहा ।
 तस्य नक्षत्राण्यऽप्सरसो बेकुरयो नाम ता इदं ब्रह्मक्षत्रं पातु ताभ्यः स्वाहा ।
 भुज्यस्सुपर्णो यज्ञो गन्धर्वः स इदं ब्रह्मक्षत्रं पातु तस्मै स्वाहा ।
 तस्य दक्षिणा अप्सरसस्तवा नाम ता इदं ब्रह्मक्षत्रं पातु ताभ्यः स्वाहा ।
 प्रजापतिर्विश्वकर्मा मनो गन्धर्वः स इदं ब्रह्मक्षत्रं पातु तस्मै स्वाहा ।
 तस्यैक्षामान्यप्सरसो वह्नयो नाम ता इदं ब्रह्मक्षत्रं पातु ताभ्यः स्वाहा ।
 इषिरो विश्वव्यचा वातो गन्धर्वः स इदं ब्रह्मक्षत्रं पातु तस्मै स्वाहा ।
 तस्यापोऽप्सरसो मुदा नाम ता इदं ब्रह्मक्षत्रं पातु ताभ्यः स्वाहा ।

भुवनस्य पते यस्य त उपरि गृहा इह च ।
 सनोरास्वाज्यानि रायस्पोषा सुवीर्यं संवत्सरीणां स्वस्ति स्वाहा ।

परमेष्ठयधिपतिर्मृत्युर्गन्धर्वः स इदं ब्रह्मक्षत्रं पातु तस्मै स्वाहा ।
 तस्य विश्वमप्सरसो भुवो नाम ता इदं ब्रह्मक्षत्रं पातु ताभ्यः स्वाहा ।
 सुक्षितिस्सुभूतिर्भद्रकृतसुवर्वाण्यर्जन्यो गन्धर्वः स इदं ब्रह्मक्षत्रं पातु तस्मै स्वाहा ।

तस्य विद्युतोऽप्सरसो रुचो नाम ता इदं ब्रह्मक्षत्रं पातु ताभ्यः स्वाहा ।
दूरे हेतिरमृडयो मृत्युर्गन्धर्वः स इदं ब्रह्मक्षत्रं पातु तस्मै स्वाहा ।
तस्य प्रजा अप्सरसो भीरवो नाम ता इदं ब्रह्मक्षत्रं पातु ताभ्यः स्वाहा ।
चारुः कृपणकाशी कामो गन्धर्वः स इदं ब्रह्मक्षत्रं पातु तस्मै स्वाहा ।
तस्याधयोऽप्सरसश्शोचयतीर्नाम ता इदं ब्रह्मक्षत्रं पातु ताभ्यः स्वाहा ।

सनो भुवनस्य पते यस्य त उपरि गृहा इह च ।
उरुब्रह्मणस्मै क्षत्राय महि शर्म यच्छ स्वाहा ॥

नमो अस्तु सर्पेभ्यो ये के च पृथिवीमनु ।
ये अन्तरिक्षे ये दिवि तेभ्यः सर्पेभ्यो नमः ॥
येऽदो रोचने दिवो ये वा सूर्यस्य रश्मिषु ।
येषामप्सु सदः कृतं तेभ्यः सर्पेभ्यो नमः ॥
या इषवो यातुधानानां ये वा वनस्पतीरनु ।
ये वाऽवटेषु शेरते तेभ्यः सर्पेभ्यो नमः ॥
॥ पंचचोडाः ॥

अयं पुरो हरिकेशः सूर्यरश्मिस्तस्य रथगृत्सश्च रथौजाश्च सेनानिग्रामण्यौ
पुञ्जिकस्थला च कृतस्थला चाप्सरसौ यातुधाना हेति रक्षसि प्रहेतिस्तेभ्यो
नमस्ते नो मृडयन्तु ते यं द्विष्मो यश्च नो द्वेष्टि तं वो जंभे दधामि ।

अयं दक्षिणा विश्वकर्मा तस्य रथस्वनश्च रथे चित्रश्च सेनानिग्रामण्यौ
मेनका च सहजन्या चाप्सरसौ
दङ्कणवः पशवो हेति पौरुषयोवधः प्रहेतिस्तेभ्यो
नमस्ते नो मृडयन्तु ते यं द्विष्मो यश्च नो द्वेष्टि तं वो जंभे दधामि ।

अयं पश्चाद्विश्वव्याचास्तस्य रथप्रोतश्चासमरथश्च सेनानिग्रामण्यौ
प्रम्लोचन्ती चानुम्लोचन्ती चाप्सरसौ सर्पा हेतिर्व्याघ्राः प्रहेतिस्तेभ्यो
नमस्ते नो मृडयन्तु ते यं द्विष्मो यश्च नो द्वेष्टि तं वो जंभे दधामि ।

अयमुत्तरात्संयद्वसुस्तस्य सेनजिच्च सुषेणश्च सेनानिग्रामण्यौ
विश्वाची च घृताची चाप्सरसावापो हेतिर्वातः प्रहेतिस्तेभ्यो
नमस्ते नो मृडयन्तु ते यं द्विष्मो यश्च नो द्वेष्टि तं वो जंभे दधामि ।

अयमुपर्यर्वागवसुस्तस्य ताक्ष्यश्चारिष्टनेमिश्च सेनानिग्रामण्यावुर्वशी
पूर्वचित्तिश्चाप्सरसौ विद्युद्धेतिरवस्फूर्जन्प्रहेतिस्तेभ्यो
नमस्ते नो मृडयन्तु ते यं द्विष्मो यश्च नो द्वेष्टि तं वो जंभे दधामि ।

॥ अप्रतिरथं ॥

आशुः शिशानो वृषभो न युध्मो घनाघनः क्षोभणश्चर्षणीनाम् ।
संक्रन्दनोऽनिमिष एकवीरः शतं सेना अजयत्साकामिन्द्रः ॥
संक्रन्दनानिमिषेण जिष्णुना युत्कारेण दुश्चयवनेन धृष्णुना ।
तदिन्द्रेण जयत तत् सहध्वं युधो नर इषुहस्तेन वृष्णा ॥
स इषुहस्तैः स निषङ्गिभिर्वशी सः स्रष्टा स युध इन्द्रो गणेन ।
सः सृष्टजित् सोमपा बाहुशर्ध्यैर्ध्वधन्वा प्रतिहिताभिरस्ता ॥
बृहस्पते परि दीयारथेन रक्षोहाऽमित्रा अपबाधमानः ।
प्रभञ्जन्त्सेनाः प्रमृणो युधा जयन्तस्माकमेध्यविता रथानाम् ॥
गोत्रभिर्दे गोविदं वज्रबाहुं जयन्तमज्म प्रमृणन्तमोजसा ।
इमं सजाता अनु वीरयध्वमिन्द्रं सखायोऽनु स रभध्वम् ॥
बलविज्ञायः स्थविरः प्रवीरः सहस्वान् वाजी सहमान उग्रः ।
अभिवीरो अभिसत्वा सहोजा जैत्रमिन्द्र रथमा तिष्ठ गोवित् ॥
अभिगोत्राणि सहसा गाहमानोऽदायो वीरश्शतमन्युरिन्द्रः ।
दुश्चयवनः पृतनाषाड्युद्धयोऽस्माकं सेना अवतु प्र युत्सु ॥
इन्द्र आसां नेता बृहस्पतिर्दक्षिन्णा यज्ञः पुर एतु सोमः ।
देवसेनानामभिभञ्जतीनां जयन्तीनां मरुतो यन्त्वग्रे ॥
इन्द्रस्य वृष्णो वरुणस्य राज्ञ आदित्यानां मरुताः शर्धं उग्रम् ।
महामनसां भुवनच्यवानां घोषो देवानां जयतामुदस्थात् ॥
अस्माकमिन्द्रः समृतेषु ध्वजेष्वस्माकं या इषवस्ता जयन्तु ।
अस्माकं वीरा उत्तरे भवन्त्वस्मानु देवा अवता हवेषु ॥
उद्धर्षय मघवन्नायुधान्युत् सत्त्वंनां मामकानां महासि ।
उद् वृत्रहन् वाजिनां वाजिनान्युद्धथानां जयतामेतु घोषः ॥
उप प्रेत जयता नरः स्थिरा वस्सन्तु बाहवः ।
इन्द्रो वशर्मं यच्छत्वनाधृष्या यथाऽसथ ॥
अवसृष्टा परा पत शरव्ये ब्रह्मसंशिता ।
गच्छामित्रान् प्रविश मैषां कं चनोच्छिषः ॥
मर्माणि ते वर्मभिश्छादयामि सोमस्त्वा राजाऽमृतेनाभिऽवस्ताम् ।
उरोर्वरीयो वरिवस्ते अस्तु जयन्तं त्वामनु मदन्तु देवाः ॥
यत्र बाणाः सम्पतन्ति कुमारा विशिखा इव ।
इन्द्रो नस्तत्र वृत्रहा विश्वाहा शर्मं यच्छतु ॥

शं च मे मयश्च मे प्रियं च मेऽनुकामश्च मे
कामश्च मे सौमनसश्च मे भद्रं च मे श्रेयश्च मे
वस्यश्च मे यशश्च मे भगश्च मे द्रविणं च मे
यन्ता च मे धर्ता च मे क्षेमश्च मे धृतिश्च मे

विश्वं च मे महश्च मे संविच्च मे ज्ञात्रं च मे
सूश्च मे प्रसूश्च मे सीरं च मे लयश्च
म ऋतं च मेऽमृतं च मेऽयक्ष्मं च मेऽनामयच्च मे
जीवातुश्च मे दीर्घायुत्वं च मेऽनमित्रं च मेऽभयं च मे
सुगं च मे शयनं च मे सुषा च मे सुदिनं च मे ॥
॥ विहव्यं ॥

ममाग्ने वचो विहवेष्वस्तु वयं त्वेन्धानास्तनुवं पुषेम ।
मह्यं नमन्तां प्रदिशश्चतस्रस्त्वयाऽध्यक्षेण पृतना जयेम ॥
मम देवा विहवे सन्तु सर्व इन्द्रावन्तो मरुतो विष्णुरग्निः ।
ममान्तरिक्षमुरु गोपमस्तु मह्यं वातः पवतां कामे अस्मिन् ॥
मयि देवा द्रविणमा यजन्तां मय्याशीरस्तु मयि देवहूतिः ।
दैव्या होतारा वनिषन्त पूर्वेऽरिष्टास्स्याम तनुवा सुवीराः ॥
मह्यं यजन्तु मम यानि हव्याऽऽकूतिः सत्या मनसो मे अस्तु ।
एनो मा नि गां कतमच्चनाहं विश्वे देवासो अधि वोचता मे ॥
देवीर्षडुर्वीरुरुणः कृणोत विश्वे देवास इह वीर्यध्वम् ।
मा हास्महि प्रजया मा तनूभिर्मा रधाम द्विषते सोम रजन् ॥
अग्निर्मन्युं प्रतिनुदन् पुरस्ताददब्धो गोपाः परिपाहि नस्त्वम् ।
प्रत्यञ्चो यन्तु निगुतः पुनस्तेऽमैषां चित्तं प्रबुधा विनेशत् ॥
धाता धातृणां भुवनस्य यस्पतिर्देवः सवितारमभिमातिषाहम् ।
इमं यजग्नमश्विनोभा बृहस्पतिर्देवाः पान्तु यजमानन्नयथात् ॥
उरुव्यचा नो महिषश्शर्म यः सदस्मिन् हवे पुरुहूतः पुरुक्षु ।
स नः प्रजायै हर्यश्च मृडयेन्द्र मा नो रीरिषो मा परा दाः ॥
येनस्सपत्ना अप ते भवन्त्विन्द्राग्निभ्यामव बाधामहे तान् ।
वसवो रुद्रा आदित्या उपरिस्पृशं मोघं चेतारमधिराजमक्रन् ॥
अर्वाञ्चमिन्द्रममुतो हवामहे यो गोजिद्धनजिदश्चजिद्यः ।
इमं नो यजं विहवे जुषस्वास्य कुर्मो हरिवो मेदिनं त्वा ॥
॥ मृगारं ॥

अग्नेर्मन्वे प्रथमस्य प्रचेतसो यं पाञ्चजन्यं बहवस्समिन्धते ।
विश्वस्यां विशि प्रविविशिवाः समीमहे स नो मुञ्चत्वः हंसः ॥
यस्येदं प्राणन्निमिषद्यदेजति यस्य जातं जनमानं च केवलम् ।
स्तौम्यग्निं नाथितो जोहवीमि स नो मुञ्चत्वः हंसः ॥
इन्द्रस्य मन्ये प्रथमस्य प्रचेतसो वृत्रघ्नः स्तोमा उप मामुपागुः ।
यो दाशुषः सुकृतो हवमुप गन्ता स नो मुञ्चत्वः हंसः ॥
यः संग्रामं नयति संवशी युधे यः पुष्टानि सः सृजति त्रयाणि ।
स्तौमीन्द्रं नाथितो जोहवीमि स नो मुञ्चत्वः हंसः ॥
मन्वे वा मित्रावरुणा तस्य वित्तं सत्यौजसा दृहणा यन्नुदेथे ।

या राजानं सरथं याध उग्रा ता नो मुञ्चतमागसः ॥
 यो वा रथं ऋजुरग्निः सत्यधर्मा मिथुश्चरन्तमुपयाति दूष्यन् ।
 स्तौमि मित्रावरुणा नाथितो जोहवीमि तौ नो मुञ्चतमागसः ।
 वायोस्सवितुर्विदधानि मन्महे यावात्मन्वद्विभृतो यौ च रक्षतः ।
 यौ विश्वस्य परिभू बभूवतुस्तौ नो मुञ्चतमागसः ॥
 उपश्रेष्ठा न आशिषो देवयोर्धर्मे अस्थिरन् ।
 स्तौमि वायुं सवितारं नाथितो जोहवीमि तौ नो मुञ्चतमागसः ॥
 रथीतमौ रथीनामह्व ऊतये शुभं गमिष्ठौ सुयमेभिरश्वैः ।
 ययोर्वा देवौ देवेष्वनिशितमोजस्तौ नो मुञ्चतमागसः ॥
 यदयातं वहतुं सूर्यायास्त्रिचक्रेण सः सदा मिच्छमानौ ।
 स्तौमि देवावश्विनौ नाथितो जोहवीमि तौ नो मुञ्चतमागसः ॥
 मरुतां मन्वे अधि नो ब्रुवन्तु प्रेमां वाचं विश्वामवन्तु विश्वे ।
 आशून्हुवे सुयमानूतये ते नो मुञ्चत्वेनसः ॥
 तिग्ममायुधं वीडितं सहस्वद्विव्यं शर्दः पृतनासु जिष्णु ।
 स्तौमि देवान्मरुतो नाथितो जोहवीमि ते नो मुञ्चत्वेनसः ॥
 देवानां मन्वे अधि नो ब्रुवन्तु प्रेमां वाचं विश्वामवन्तु विश्वे ।
 आशून् हुवे सुयमानूतये ते नो मुञ्चत्वेनसः ॥
 यदिदं माऽभिगोचरति पौरुषेयेण दैव्येन ।
 स्तौमि विश्वान्देवान्नाथितो जोहवीमि ते नो मुञ्चत्वेनसः ॥
 अनुनोऽद्यानुमतिर्यज्ञं देवेषु म् अन्यताम् ।
 अग्निश्च हव्यवाहनो भवतां दाशुषे मयः ॥
 अन्विदनुमते त्वं मन्यासै शं च नः कृधि ।
 ऋत्वे दक्षाये नो हि नु प्रण आयूषि तारिषः ॥
 वैश्वानरो न ऊत्याऽऽप्र यातु परावतः । अग्निरुक्थेन वाहसा ॥
 पृष्टो दिवि पृष्टो अग्निः पृथिव्यां पृष्टो विश्वा ओषदीराविवेश ।
 वैश्वानरसहसा पृष्टो अग्निस्सनो दिवा सारिषः पातु नक्तम् ॥
 ये अप्रथेताममितेभिरोजोभिर्ये प्रतिष्ठे अभवतां वसूनाम् ।
 स्तौमि द्यावापृथिवी नाथितो जोहवीमि ते नो मुञ्चतमंहसः ॥
 उर्वी रोदसी वरिवः कृणोतं क्षेत्रस्य पत्नी अधि नो ब्रूयतम् ।
 स्तौमि द्यावापृथिवी नाथितो जोहवीमि ते नो मुञ्चतमंहसः ॥
 यत् ते वयं पुरुषत्रा यविष्ठायविष्ठा विद्वांसश्चक्रुमा कच्चनाऽऽगः ।
 कृधी स्वस्मा अदितेरनागा व्येनांसि शिश्रथो विष्वगग्ने ॥
 यथाह तद्वसवो गौर्यं चित् पदिषिताममुञ्चता यजत्राः ।
 एवा त्वमस्मत् प्र मुञ्चाव्यहः प्रातार्थग्ने प्रतरान्न आयुः ॥
 ॥ सर्पाहुतीः ॥
 समीची नामासि प्राचीदिक्तस्यास्तेऽग्निरधिपतिरसितो रक्षिता

यश्चादिपतिर्यश्च गोप्ता ताभ्यां नमस्तौ नो मृडयतां
 ते यं द्विष्मो यश्च नो द्वेष्टि तं वा जंभे दधामि ।
 ओजस्विनी नामासि दक्षिणा दिक्तस्यास्ते इन्द्रोऽधिपतिः पृदाकू रक्षिता
 यश्चादिपतिर्यश्च गोप्ता ताभ्यां नमस्तौ नो मृडयतां
 ते यं द्विष्मो यश्च नो द्वेष्टि तं वा जंभे दधामि ।
 प्राची नामासि प्रतीची दिक्तस्यास्ते सोमोऽधिपतिः स्वजो रक्षिता
 यश्चादिपतिर्यश्च गोप्ता ताभ्यां नमस्तौ नो मृडयतां
 ते यं द्विष्मो यश्च नो द्वेष्टि तं वा जंभे दधामि ।
 अवस्थावा नामास्युदीची दिक्तस्यास्ते वरुणोऽधिपतिस्तरश्च राजी रक्षिता
 यश्चादिपतिर्यश्च गोप्ता ताभ्यां नमस्तौ नो मृडयतां
 ते यं द्विष्मो यश्च नो द्वेष्टि तं वा जंभे दधामि ।
 अधिपत्नी नामासि बृहती दिक्तस्यास्ते बृहस्पतिरधिपतिः श्वित्रो रक्षिता
 यश्चादिपतिर्यश्च गोप्ता ताभ्यां नमस्तौ नो मृडयतां
 ते यं द्विष्मो यश्च नो द्वेष्टि तं वा जंभे दधामि ।
 वशिनी नामासीयं दिक्तस्यास्ते यमोऽधिपतिः कल्माषग्रीवो रक्षिता
 यश्चादिपतिर्यश्च गोप्ता ताभ्यां नमस्तौ नो मृडयतां
 ते यं द्विष्मो यश्च नो द्वेष्टि तं वा जंभे दधामि ॥

॥ गन्धर्वाहुतीः ॥

हेतयो नामस्थ तेषां वः पुरो गृहा अग्निर्व इषवः सलिलो
 वातनामं तेभ्यो वो नमस्तेनो मृडयत
 ते यं द्विष्मो यश्च नो द्वेष्टि तं वो जंभे दधामि ।
 निलिम्पा नामस्थ तेषां वो दक्षिणा गृहा पितरो वइषवः सगरो
 वातनामं तेभ्यो वो नमस्तेनो मृडयत
 ते यं द्विष्मो यश्च नो द्वेष्टि तं वो जंभे दधामि ।
 वज्रिणो नामस्थ तेषां वः पश्चाद्गृहा स्वप्नोव इषवो गह्वरो
 वातनामं तेभ्यो वो नमस्तेनो मृडयत
 ते यं द्विष्मो यश्च नो द्वेष्टि तं वो जंभे दधामि ।
 अवस्थावानो नामस्थ तेषां व उत्तरद्गृहा आपोव इषवः समुद्रो
 वातनामं तेभ्यो वो नमस्तेनो मृडयत
 ते यं द्विष्मो यश्च नो द्वेष्टि तं वो जंभे दधामि ।
 अधिपतयो नामस्थ तेषां व उपरि गृहा वर्ष व इषवोऽवस्वान्
 वातनामं तेभ्यो वो नमस्तेनो मृडयत
 ते यं द्विष्मो यश्च नो द्वेष्टि तं वो जंभे दधामि ।
 क्रव्या नामस्थ पार्थिवतेषां व इह गृहा अन्नं व इषवोऽनिमिषो
 वातनामं तेभ्यो वो नमस्तेनो मृडयत
 ते यं द्विष्मो यश्च नो द्वेष्टि तं वो जंभे दधामि ।

॥ अज्यानि ॥

शतायुधाय शतवीर्याय शतोत्तयेऽभिमातिषाहे ।
शतं यो नः शरदो अजीतानिन्द्रो नेषदति दुरितानि विश्वा ॥
ये चत्वारः पथयो देवयाना अंतरा द्यावापृथिवी वियन्ति ।
तेषां यो अज्यानि मजीति माहवात्तस्मै नो देवाः परिदत्तेह सर्वे ॥
ग्रीष्मो हेमन्त उत्तनो वसन्तः शरद्वर्षाः सुवितन्नो अस्तु ।
तेषामृतूनां शतशरदानां निवात एषामभये स्याम ॥
इदुवत्सराय परिवत्सराय संवत्सराय कृणुता बृहन्नमः ।
तेषां वयः सुमतौ यज्ञियानां ज्योगजीता अहताः स्याम ॥
भद्रान्नः श्रेयः समनैष्ट देवास्त्वयाऽवसेन समशीमहि त्वा ।
स नो मयोभूः पितो आविशस्व शन्तोकाय तनुवै स्यो नः ॥

भूतं भव्यं भविष्यद्वषदस्वाहा नम ऋक्सामयजुर्वषदस्वाहा नमो
गायत्रीऋग्विष्णुजगतीवषदस्वाहा नमः पृथिव्यन्तरिक्षम् द्यौर्वषदस्वाहा
नमोऽग्निर्वायुः सूर्यो वषदस्वाहा नमः प्राणो व्यानोऽपानो वषदस्वाहा
नमोऽन्नं कृषिर्वृष्टिर्वषदस्वाहा नमः पिता पुत्रः पौत्रो वषदस्वाहा नमो
भूर्भुवः सुवर्वषदस्वाहा नमः ।

॥ अथर्वशिरसं ॥

इन्द्रोदधीचो अस्थभिः । वृत्राण्यप्रतिष्कृतः । जघान नवतीर्नव ।
इच्छन्नश्चस्य यच्छिरः । पर्वतिष्वपश्रितम् । तद्विदच्छिर्यणावति ।
अत्राह गोरमन्वत । नाम त्वष्टुरपीच्यम् । इत्थ चन्द्रमसो गृहे ।
इन्द्रमिद्राधिनो बृहत् । इन्द्रमर्केभिरर्किणः । इन्द्रं वानीरनूषत ।
इन्द्र इद्रयोः सचा । समिश्रल आवचो युजा । इन्द्रो वज्रीहिर्ण्ययः ।
इन्द्रो दीर्घाय चक्षसे । आसूर्यः रोहयद्विवि । विगोभिरद्रिमैरयत् ।
इन्द्र वाजेषु नो अव । सहस्रप्रधनेषु च । अग्र अग्राभिरुतिभिः ।
तमिन्द्रं वाजयामसि । महे वृत्राय हन्तवै । सा वृषा वृषभोऽभुवत् ।
इन्द्रः स दामने कृतः । ओजिष्ठः सबलेहितः । द्युम्नी श्लोकी ससौम्यः ।
गिरा वज्रो न संभृतः । सबलो अनपच्युतः । ववक्षुरुग्रो अस्तृतः ।
॥ प्रत्यंगिरसं ॥

चक्षुषो हेते मनसो हेते । वाचोहेते ब्रह्मणो हेते ।
यो माऽघायुरभिदासति । तमग्ने मेन्याऽमेनि कृणु ।
यो मा चक्षुषा यो मनस । यो वाचा ब्रह्मणाघायुरभिदासति ।
तयाऽग्ने त्वं मेन्याअ । अमुममेनि कृणु ।
यत्किञ्चासौ मनसा यच्च वाचा । यज्ञैर्जुहोति यजुष हविर्भिः ।
तन्मृत्युनिर्ऋत्या संविदानः । पुरादिष्टादाहुतीरस्य हन्तु ।

या॒तु॒धा॒ना नि॒र्ऋ॒ति॒रा॒दु र॒क्षः । ते अ॒स्य॒घ्न॒न्त्व॒नृ॒तेन॒ स॒त्यम् ।
 इ॒न्द्रे॒षि॒ता आ॒ज्य॒मस्य॒ म॒थ॒न्तु । मा तत्स॒मृ॒द्धि॒ यद॒सौ क॒रोति॑ ।
 ह॒न्मि॑ ते॒ऽहं कृ॒तः ह॒विः । यो मे॑ घो॒रम॒चीकृ॑तः ।
 अ॒पा॑ चो॒त उ॒भौ बा॒हू । अ॒प॒न॒ह्या॒म्या॒स्यम् ।
 अ॒प॒न॒ह्या॒मि ते बा॒हू । अ॒प॒न॒ह्या॒म्या॒स्यम् ।
 अ॒ग्ने॒र्दे॒वस्य॒ ब्र॒ह्म॒णा । स॒र्वं ते॒ऽव॒धिषं॑कृतम् ।
 पु॒रा॒ऽमु॒ष्य व॒ष॒ट्का॒रात् । य॒ज्ञं दे॒वेषु॑ न॒स्कृ॒धि ।
 स्वि॒ष्ट॒म॒स्माकं॑ भ्यूयात् । मा॒ऽस्मान् प्रा॒प॒न्न॒रा॒तयः॑ ।
 अ॒न्ति॒दू॒रे स॒तो अ॒ग्ने । भ्रातृ॒व्यस्या॒भिदा॑सतः ।
 व॒ष॒ट्का॒रेण॒ वज्रे॑ण । कृ॒त्याः ह॒न्मि॑ कृ॒ता॒म॒हम् ।
 यो मा॒ न॒क्तं दि॒वा सा॒यम् । प्रा॒तश्चा॒ह्नो नि॒पी॒यति॑ ।
 अ॒द्या॒तमि॒न्द्र वज्रे॑ण । भ्रातृ॒व्यं पा॒दया॑मसि ।
 प्रा॒णो र॒क्षति॑ वि॒श्वमे॒जत् । इ॒यो भू॒त्वा ब॒हु॒दा ब॒हूनि॑ ।
 स इ॒त्स॒र्वं व्या॑न॒शे । यो दे॒वो दे॒वेषु॑ वि॒भूर॑न्तः ।
 आ॒वृ॒द्धा॒त् क्षे॒त्रि॒यध्व॑ग॒दृषा॑ । तमि॒त्प्रा॒णं म॒नसो॑प॒शिक्ष॑त ।
 अ॒ग्रं दे॒वाना॑मि॒दम॑त्तु नो ह॒विः । म॒नस॑श्चि॒त्ते॒दम् ।
 भू॒तं भ॒व्यं च॑ गु॒प्यते॑ । तद्वि॒दे॒वेष्व॑ग्रि॒यम् ।
 आ न॑ ए॒तु॒पुर॑श्च॒रम् । स॒ह दे॒वैरि॑मः ह॒वम् ।
 म॒नः श्रे॒यसि॑ श्रे॒यसि॑ । क॒र्म॒न्य॒ज्ञप॑तिं दधेत् ।
 जु॒षता॑ मे॒ वा॒गि॒दः ह॒विः । वि॒राड् दे॒वी पु॒रोहि॑ता ।
 ह॒व्य॒वा॒डन॑पा॒यिनी॑ । य॒या रू॒पाणि॑ ब॒हु॒दा वद॑न्ति ।
 पे॒शाः॑ सि॒ दे॒वाः पर॑मे ज॒नित्रे॑ । सा नो॑ वि॒राडन॑प॒स्फुर॑न्ति ।
 वा॒गदे॒वी जु॒षता॑मि॒दः ह॒विः । चक्षु॑र्दे॒वानां॑ ज्योति॒र॒मृते॑ न्य॒क्तम् ।
 अ॒स्य वि॒ज्ञा॒नाय॑ ब॒हु॒धा नि॒धी॒यते॑ । तस्य॑ सु॒न्म॒म॒शीम॑हि ।
 मा नो॑ हा॒सी॒द्विच॑क्षणम् । आ॒यु॒रि॒न्नः प्र॑ती॒र्यता॑म् ।
 अ॒न॒न्धा॒श्चक्षु॑षा॒वय॑म् । जी॒वा ज्योति॑र॒शीम॑हि ।
 सु॒व॒ज्यो॒ति॒स्ता॒मृ॒तम् । श्रो॒त्रेण॑ भ॒द्र॒मु॒त शृ॑ण्वन्ति स॒त्यम् ।
 श्रो॒त्रेण॑ वा॒चं ब॒हु॒धो॒द्यमा॑नाम् । श्रो॒त्रेण॑ मो॒द॒श्च म॒ह॒श्च श्रू॑यते ।
 श्रो॒त्रेण॑ स॒र्वा दि॒श आ॑शृ॒णोमि॑ । येन॒ प्रा॒च्या॒ उ॒त दक्षि॑णा ।
 प्र॒ती॒च्ये॒दि॒शः शृ॑ण्वन्त्यु॒त्तरा॑त् । तदि॒च्छो॒त्रं ब॒हु॒धो॒द्यमा॑नम् ।
 अ॒रा॒न्न॒ने॒मिः प॒रि॒स॒र्वं ब॒भूव॑ ।

सि॒न्धे व्या॒घ्र उ॒त या॒ पृ॒दा॒कौ । त्वि॒षि॒र॒ग्नौ ब्रा॑ह्म॒णे सूर्ये॑या ।
 इ॒न्द्रं या॒ दे॒वी सु॒भगा॑ ज॒जान॑ । सा न आ॒ग॒न्व॒र्चसा॑ संवि॒दाना॑ ।
 या रा॒ज॒न्ये दु॒न्दु॒भा॒वाय॑तायाम् । अ॒श्वस्य॑ क्र॒न्दो॒पु॒रुष॑स्य मा॒यौ ।
 इ॒न्द्रं या॒ दे॒वी सु॒भगा॑ ज॒जान॑ । सा न आ॒ग॒न्व॒र्चसा॑ संवि॒दाना॑ ।

या ह॒स्तिनि॒ द्वीपि॒नि या॒ हिर॑ण्ये । त्वि॒षिर॑श्चे॒षु पु॒रुषे॑षु गो॒षु ।
 इन्द्रं॑ या दे॒वी सु॒भगा॑ ज॒जान॑ । सा न आ॒गन्व॑र्च॒सा संवि॑दाना ।
 रथे॑अ॒क्षे॒षु वृ॒षभ॑स्य॒ वजे॑ । वाते॑ प॒र्जन्ये॒ वरु॑णस्य॒ शुष्मे॑ ।
 इन्द्रं॑ या दे॒वी सु॒भगा॑ ज॒जान॑ । सा न आ॒गन्व॑र्च॒सा संवि॑दाना ।
 रा॒डसि॑ वि॒राड॑सि । स॒म्राड॑सि स्व॒राड॑सि ।
 इन्द्रा॑य त्वा तेज॑स्वते तेज॑स्वन्तः॑ श्री॒णामि॑ ।
 इन्द्रा॑य त्वौज॑स्वते ओज॑स्वन्तः॑ श्री॒णामि॑ ।
 इन्द्रा॑य त्वा प॒यस्व॑ते प॒यस्व॑न्तः॑ श्री॒णामि॑ ।
 इन्द्रा॑य त्वाऽऽयु॑ष्मते आ॒युष्म॑न्तः॑ श्री॒णामि॑ ।
 तेजो॑ऽसि । तत्ते प्र॒यच्छा॑मि । तेज॑स्वदस्तु मे॒ मुख॑म् ।
 तेज॑स्वच्छि॒रो अस्तु॑ मे । तेज॑स्वान् वि॒श्वतः॑ प्र॒त्यङ् ।
 तेज॑सा संपि॒पृग्धि॑ मा ।
 ओजो॑ऽसि । तत्ते प्र॒यच्छा॑मि । ओज॑स्वदस्तु मे॒ मुख॑म् ।
 ओज॑स्वच्छि॒रो अस्तु॑ मे । ओज॑स्वान् वि॒श्वतः॑ प्र॒त्यङ् ।
 ओज॑सा संपि॒पृग्धि॑ मा ।
 पयो॑ऽसि । तत्ते प्र॒यच्छा॑मि । प॒यस्व॑दस्तु मे॒ मुख॑म् ।
 प॒यस्व॑च्छि॒रो अस्तु॑ मे । प॒यस्वान् वि॒श्वतः॑ प्र॒त्यङ् ।
 प॒यसा॑ संपि॒पृग्धि॑ मा ।
 आयु॑र॒सि । तत्ते प्र॒यच्छा॑मि । आयु॑ष्मदस्तु मे॒ मुख॑म् ।
 आयु॑ष्मच्छि॒रो अस्तु॑ मे । आयु॑ष्मान् वि॒श्वतः॑ प्र॒त्यङ् ।
 आयु॑षा संपि॒पृग्धि॑ मा ।
 इ॒मम॑ग्न॒ आयु॑षे व॒र्चसे॑ कृ॒धि । प्रि॒यः रे॒तो वरु॑ण सोम॒ राजन् ।
 मा॒तेवा॑स्मा अ॒दिते॑ श॒र्म यच्छ॑ । वि॒श्वे दे॒वा ज॒रद॑ष्टि॒र्यथा॑ऽसत् ।
 आयु॑र॒सि वि॒श्वायु॑र॒सि । स॒र्वायु॑र॒सि स॒र्वमा॑यु॒रसि॑ ।
 यतो॑ वातो॒ मनो॑ज॒वाः । यतः॑ क्ष॒रन्ति॑ सि॒न्धवः॑ ।
 तासा॑न्त्वा स॒र्वासा॑ रु॒चा । अ॒भिषि॑चामि व॒र्चसा॑ ।
 स॒मुद्र॑ इ॒वासि॑ गृ॒ह्मना॑ । सोम॑ इ॒वास्य॑दा॒भ्यः ।
 अ॒ग्निरि॑व वि॒श्वतः॑ प्र॒त्यङ् । सूर्य॑ इ॒व ज्योति॑षा वि॒भूः ।
 अ॒पां यो द्र॑व॒ण रसः॑ । तम॑ह॒मस्मा॑ आ॒मुष्या॑य॒णाय॑ ।
 तेज॑से ब्र॒ह्मव॑र्च॒साय॑ गृ॒ह्मामि॑ ।
 अ॒पां यो ऊ॒र्मो रसः॑ । तम॑ह॒मस्मा॑ आ॒मुष्या॑य॒णाय॑ ।
 ओज॑से वी॒र्या॑य गृ॒ह्मामि॑ ।
 अ॒पां यो म॑ध्य॒तो रसः॑ । तम॑ह॒मस्मा॑ आ॒मुष्या॑य॒णाय॑ ।
 पु॒ष्टे प्र॑जन॒नाय॑ गृ॒ह्मामि॑ ।
 अ॒पां यो य॒ज्ञियो॑ रसः॑ । तम॑ह॒मस्मा॑ आ॒मुष्या॑य॒णाय॑ ।
 आयु॑षे दी॒र्घायु॑त्वाय॑ गृ॒ह्मामि॑ ।

अहमस्मि प्रथमजा ऋतस्य । पूर्व देवेभ्यो अमृतस्य नाभिः ।
 यो मा ददाति स इदेव मा वा । अहमन्नमन्नमदन्तमसि ।
 पूर्वमग्नेरपि दहत्यन्नम् । यत्तो हासाते अहमुत्तरेषु ।
 व्यात्तमस्य पशवस्सुजम्भम् । पश्यन्ति धीरा प्रचरन्ति पाकाः ।
 जहाम्यन्नजहाम्यन्नम् । अहमन्नं वशमिच्चरामि ।
 समानमर्थं पर्येमि भुजत् । को मामन्नं मनुष्यो दयेत ।
 पराके अन्नं निहितं लोक एतत् । विश्वे देवैः पितृभिर्गुप्तमन्नम् ।
 यदद्यते लुप्यते यत्परोप्यते । शततमी सा तनूर्मे बभूव ।
 महान्तौ चरुं सकृद्बुधेन पप्रौ । दिवं च पृथिञ् पृथिवीं च साकम् ।
 तत्संपिबन्तो न मिनन्ति वेधसः । नैतद्भूयो भवति नो कनीयः ।
 अन्नं प्राणमन्नमपानमाहुः । अन्नं मृत्युं तमु जीवातुमाहुः ।
 अन्नं ब्रह्माणो जरसं वदन्ति । अन्नमाहुः प्रजननं प्रजानाम् ।
 मोघमन्नं विन्दते अप्रचेताः । सत्यं ब्रवीमि वध इत्स तस्य ।
 नार्यमणं पुष्यति नो सखायम् । केवलाघो भवति केवलादि ।
 अहं मेघस्तनयन्वर्षन्नस्मि । मामदन्त्यहमद्यन्यान् ।
 अहंसदमृतो भवामि । मदादित्या अधि सर्वे तपन्ति ।
 देवी वाचमजनयन्त देवाः । तां विश्वरूपाः पशवो वदन्ति ।
 सा नो मन्त्रेषूमूर्जं दुहाना । धेनुर्वागस्मानुपसृष्टैतु ।
 यद्वागवदन्त्यविचेतनानि । राक्ष्सी देवानां निषसादमन्द्रा ।
 चतस्र ऊर्जदुदुहे पयांसि क्वस्विदस्याः परमं जगाम ।
 अनन्तामन्तादधि निर्मिता महीम् । यस्यां देवा अदधुर्भोजनानि ।
 एकाक्षरमां द्विपदाषत्पदाञ्च । वाचं देवा उपजीवन्ति विश्वे ।
 वाचं देवा उपजीवन्ति विश्वे । वाचं गन्धर्वाः पशवो मनुष्याः ।
 वाचीमाविश्वा भुवनान्यपिन्ता । सा नो हवं जुषतामिन्द्रपत्नी ।
 वागक्षरं प्रथमजा ऋतस्य । वेदानां माताऽमृतस्य नाभिः ।
 सानो जुषाणोप यज्ञमागात् । अवन्ती देवी सुहवामि अस्तु ।
 यामृषयो मन्त्रकृतो मनीषिणः । अन्वेच्छन्देवास्तपसा श्रमेण ।
 तां देवी वाचं हविषा यजामहे । सा नो दधातु सुकृतस्य लोके ।
 चत्वारि वाक्परिमिता पदानि । तानि विदुर्ब्राह्मणा ये मनीषिणः ।
 गुहा त्रीणि निहिता नेगयन्ति । तुरीयं वाचो मनुष्या वदन्ति ।
 श्रद्धयाग्निः समिध्यते । श्रद्धया विन्दते हविः ।
 श्रद्धां भगस्य मुर्धनि वचया वेदयामसि ।
 प्रियं श्रद्ध ददतः । प्रियं श्रद्ध दिदासतः ।
 प्रियं भोजेषु यज्वसु । इदं म उदितं कृधि ।
 यथा देवा असुरेषु । श्रद्धामुग्रेषु चक्रिरे ।
 एवं भोजेषु यज्वसु । अस्माकमुदितं कृधि ।

श्रद्धं देवा यजमानाः । वायुगोपा उपासते ।
 श्रद्धां हृदय्याऽऽकृत्या । श्रद्धया हूयते हविः ।
 श्रद्धां प्रातर्हवामहे । श्रद्धां मध्यंदिनं परि ।
 श्रद्धां सूर्यस्य निमृचि । श्रद्धे श्रद्धापयेह मा ।
 श्रद्धा देवानधिवस्ते । श्रद्ध विश्वमिदं जगत् ।
 श्रद्धां कामस्य मातरम् । हविषं वर्धयामसि ।
 ब्रह्मजज्ञानं प्रथमं पुरस्तात् । विसीमतस्सुरुचो वेन आवः ।
 स बुध्न्या उपमा अस्य विष्टाः । सतश्च योनिमसतश्च विवः ।
 पिता विराजामृषभो रयीणाम् । अन्तरिक्षं विश्वरूप आविवेश ।
 तमकैरभ्यर्चन्ति वत्सम् । ब्रह्म सन्तं ब्रह्मणा वर्धयन्तः ।
 ब्रह्म देवानजनयत् । ब्रह्म विश्वमिदं जगत् ।
 ब्रह्मणः क्षत्रन्निर्मितम् । ब्रह्म ब्राह्मण आत्मना ।
 अन्तरस्मिन्नेमे लोकाः । अन्तर्विश्वमिदं जगत् ।
 ब्रह्मैव भूतानां ज्येष्ठम् । तेन कोऽर्हति स्पर्धितुम् ।
 ब्रह्मन्देवास्त्रयस्त्रिंशत् । ब्रह्मन्निन्द्रप्रजापती ।
 ब्रह्मन् ह विश्वा भूतानि । नावीवान्तः समाहिता ।
 चतस्र आशाः प्रचरन्त्वग्नयः । इमं नो यज्ञं नयतु प्रजानन् ।
 घृतं पिन्वन्नजरं सुवीरम् । ब्रह्मसमिद्धवत्याहुतीनाम् ।
 आगावो अगमन्नुत भद्रमक्रन् । सीदन्तु गोष्ठेरणयन्त्वस्मे ।
 प्रजावतीः पुरुरूपा इह स्युः । इन्द्राय पूर्वीरुषसो दुहानाः ।
 इन्द्रो यज्वने पृणते चक्षि क्षति । उपददाति न स्वं मुषायति ।
 भूयो भूयो रयिमिदस्य वर्धयन् । अभिन्ने खिल्ले निदधाति देवयुम् ।
 न ता नशन्ति न दधाति तस्करः । नैनं अमित्रो व्यथिरदधर्षति ।
 देवाश्च याभिर्यजते ददाति च । ज्योगित्ताभिस्सचते गोपतिः सह ।
 न ता अवा रेणुकं कातो अश्नुते । न संस्कृतत्रपुपयन्ति ता अभि ।
 उरुणायमभयन्तस्य ता अनु । गावो मर्त्यस्य विचिरन्ति यज्वनः ।
 गावो भगो गाव इन्द्रो मे अच्छात् । गावः सोमस्य प्रथमस्य भक्षः ।
 इमा यागावस्सर्जना स इन्द्रः । इच्छामीद्धदा मनसा चिदिन्द्रम् ।
 यूयं गावो मेदयथा कृशंचित् । अश्लीलं चित्कृणुथा सुप्रतीकम् ।
 भद्रं गृहं कृणुथ भद्रवाचः । बृहद्वो वयं उच्यते सभासु ।
 प्रजावतीः सूयवसं रिशन्ती । शुद्धा अपस्सु प्रपाणे पिबन्तीः ।
 मावस्तेन इशत् माघशंसः । परिवोहेती रुद्रस्य वृज्यात् ।
 उपेदमुपपर्वनम् । आसु गोषूप पृच्यताम् ।
 उपेभस्य रेतसि । उपेन्द्र तव वीर्ये ।
 ता सूर्याचन्द्रमसा विश्वभृत्तमामहत् ।
 तेजो वसु मद्राजतो दिवि । सामात्मानाचरतस्साम चारिणा ।

ययोऽर्तन्नममे जातुदेवयोः । उभावन्तौ परियात अम्यौ ।
 दिवो नरश्मीस्तनुतोव्यण्वि । उभा भुवन्तीभुवना कविक्रतू ।
 सूर्या न चन्द्रा चरतो हुतामती । पतीद्युमद्विष्विदा उभा दिवः ।
 सूर्या उभा चन्द्रमसा विचक्षणा । विश्ववारा वरिवो भावरेण्या ।
 ता नोऽवतं मतिमन्ता महिब्रता । विश्व वपरे प्रतरणा तरन्ता ।
 सुवर्विदा दृशये भूरि रश्मी । सूर्या हि चन्द्रा वसुत्वेष दर्शता ।
 मनस्विनो भाऽनुचरतोनुसदिवम् । अस्य श्रवो नद्यः सप्त बिभ्रति ।
 द्यावाक्षामा पृथिवी दर्शतं वपुः । अस्मे सूर्यां चन्द्रमसाऽभिचक्षे ।
 श्रद्धेकमिन्द्र चरतो विचर्तुर्म । पुर्वापरं चरतोमाययैतौ ।
 शिशू क्रीडन्तौ परियातो अध्वरम् । विश्वान्यन्यो भुवनाऽभिचष्टे ।
 ऋतूनन्यो विदधज्जायते पुनः ।

हिरण्यवर्णाः शुचयः पावका यासु जातः कश्यपो यास्विन्द्रः ।
 अग्निं या गर्भम् दधिरे विरूपास्तान आपश्शः स्योना भवन्तु ॥
 यासां राजा वरुणो याति मध्ये सत्यानुते अवपश्यम् जनानाम् ।
 मधुस्तुतश्शुचयो याः पावकास्ता न आपश्शः स्योना भवन्तु ॥
 यासां देवा दिवि कृण्वन्ति भक्षं या अन्तरिक्षे बहुधा भवन्ति ।
 याः पृथिवीम् पयसोन्दन्ति शुक्रास्ता न आपश्शः स्योना भवन्तु ॥
 शिवेन मा चक्षुषा पश्यतापश्शिवया तनुवोप स्पृशत त्वचम् मे ।
 सर्वाः अग्नी रप्सुषदो हुवे वो मयि वर्चो बलमोजो निधत्त ॥

आपोभद्रा गृतमिदाप आसुरग्नीषोमौ बिभ्रात्याप इत्ताः ।
 तीव्रो रसो मधुपृचामरंगम् आ मा प्राणेन सह वर्च सागन् ॥
 आदित्पश्याम्युत वा शृणोम्यामा घोषो गच्छति वाङ् न आसाम् ।
 मन्येभेजानो अमृतस्य तर्हि हिरण्यवर्णा अतृपं यदावः ॥

नासदासीन्नो सदासीत्तदानीम् । नासीद्रजो नो व्योमा परो यत् ।
 किमावर्विवः कुह कस्य शर्मन् । अम्भः किमासीद्गहनं गभीरम् ।
 न मृत्युर्मृतं तर्हि न । रात्रिया अह्ना आसीत् प्रकेतः ।
 आनीदवातः स्वधया तदेकम् । तस्माद्धान्यं न परः किंचनास ।
 तम आसीत्तमसा गूढमग्रे प्रकेतम् । सलिलः सर्वं मा इदम् ।
 तुच्छेनाभवपि हितं यदासीत् । तमस्तन्महिना जायतैकम् ।
 कामस्तदग्रे समवर्तताधि । मनसो रेतः प्रथमं यदासीत् ।
 स तो बन्धुमसति निरविन्दन् । हृदिप्रतीष्या कवयो मनीषा ।
 तिरश्चीनो विततो रश्मिरेषाम् । अधस्विदासी ३ दुपरिस्विदासी ३ त् ।
 रेतोधा आसन्महिमा न आसन् । स्वधा अवस्तात् प्रयतिः परस्तात् ।

को अद्वा वेद क इह प्रवोचत् । कुत आ जाता कुत इयं विसृष्टिः ।
 अर्वाग्देवा अस्य विसर्जनाय । अथा को वेदयत आ बभूव ।
 इयं विसृष्टिर्यत आबभूव । यदि वा दधे यदि वा न ।
 यो अस्याध्यक्षः परमे व्योमन् । सो अंग वेद यदि वा न वेद ।
 किं स्विद्वनं क उ स वृक्ष आसीत् । यतो द्यावापृथिवी निष्टतक्षुः ।
 मनीषिणो मनसापृच्छते दुतत् । यदध्यतिष्ठद्वनानि धारयन् ।
 ब्रह्म वनं ब्रह्म सवृक्ष आसीत् । यतो द्यावापृथिवी निष्टतक्षुः ।
 मनीषिणो मनसा विब्रवीमि वः । ब्रह्माध्यतिष्ठद्वनानि धारयन् ।
 प्रातरग्निं प्रातरिन्द्रं हवामहे । प्रातर्मित्रावरुणा प्रातरश्विनो ।
 प्रातर्भगं पूषणं ब्रह्मणस्पतिम् । प्रातः सोममुत रुद्रं हुवेम ।
 प्रातर्जितं भगमुग्रं हुवेम । वयं पुत्रमदितेयो विधर्ता ।
 आग्नश्चिद्यं मन्यमानस्तुरश्वित् । राजाचिद्यं भगं भक्षीत्याह ।
 भग प्रणेत्तर्भग सत्यराधः । भगेमां धियमुदवददन्नः ।
 भग प्रणो जनय गोभिरश्वैः । भग प्रनृभिर्नृवन्तः स्याम ।
 उत्तेदानी भगवन्तः स्याम । उत्त प्रपित्व उत्त मध्य अह्नाम् ।
 उत्तोदिता मघवन्तसूर्यस्य । वयं देवानां सुमतौ स्याम ।
 भग एव भगवां अस्तु देवाः । तेन वयं भगवन्तः स्याम ।
 तन्त्वा भग सर्व इज्जोहवीमि । सनो भग पुर एता भवेह ।
 समध्वरायोषसोनमन्त । दधिक्रावेव शुचये पदार्य ।
 अर्वाचीनं वसुविदं भगन्नः । रथमिवाश्वा वाजिन आवहन्तु ।
 अश्वावतीर्गोमतीर्न उषासः । वीरवतीः सदमुच्छन्तु भद्राः ।
 घृतं दुहाना विश्वतः प्रपीनाः । यूयं पात स्वस्तिभिः सदा नः ।

अग्निर्नः पातु कृत्तिकाः । नक्षत्रं देवमिन्द्रियम् ।
 इदमासां विचक्षणम् । हविरासं जुहोतन ।
 यस्य भान्ति रश्मयो यस्य केतवः । यस्येमा विश्वा भुवनानि सर्वा ।
 स कृत्तिकाभिरभिसंवसानः । अग्निर्नो देवस्सुविते दधातु ॥
 प्रजापति रोहिणीवेतु पत्नी । विश्वरूपा बृहती चित्रभानुः ।
 सा नो यज्ञस्य सुविते दधातु । यथा जीवेम शरदस्सवीराः ।
 रोहिणी देव्युदगात्पुरस्तात् । विश्वा रूपणि प्रतिमोदमाना ।
 प्रजापतिं हविषा वर्धयन्ती । प्रिया देवानामुपयातु यज्ञम् ॥
 सोमो राजा मृगशीर्षेण आगन् । शिवं नक्षत्रं प्रियमस्य धाम ।
 आप्यायमानो बहुधा जनेषु । रेतः प्रजां यजमाने दधातु ।
 यत्ते नक्षत्रं मृगशीर्षमस्ति । प्रियं राजन् प्रियतमं प्रियाणाम् ।
 तस्मै ते सोम हविषा विधेम । शन्न एधि द्विपदे शं चतुष्पदे ॥
 आर्द्रया रुद्रः प्रथमा न एति । श्रेष्ठो देवानां पतिरघ्नियानाम् ।

नक्षत्रमस्य हविषा विधेम । मा नः प्रजाः रीरिषन्मोत वीरान् ।
 हेति स्द्रस्य परिणो वृणक्तु । आर्द्रा नक्षत्रं जुषताः हविर्नः ।
 प्रमुञ्चमानौ दुरितानि विश्वा । अपाघशः सन्नुदतामरातिम् ॥
 पुनर्नो देव्यदितिस्पृणोतु । पुनर्वसूनः पुनरेता यज्ञम् ।
 पुनर्नो देवा अभियन्तु सर्वे । पुनः पुनर्वो हविषा यजामः ।
 एवा न देव्यदितिरनर्वा । विश्वस्य भर्त्री जगतः प्रतिष्ठा ।
 पुनर्वसू हविषा वर्धयन्ती । प्रियम् देवानामप्येतु पार्थः ॥
 बृहस्पतिः प्रथमं जायमानः । तिष्यम् नक्षत्रमभि संबभूव ।
 श्रेष्ठो देवानां पृतनासुजिष्णुः । दिशोऽनु सर्वा अभयन्नो अस्तु ।
 तिष्यः पुरस्तादुत मध्यतो नः । बृहस्पतिर्नः परिपातु पश्चात् ।
 बाधेतान्द्वेषो अभयं कृणुताम् । सुवीर्यस्य पतयस्याम् ॥
 इदं सर्पेभ्यो हविरस्तु जुष्टम् । आश्रेषा येषामनुयन्ति चेतः ।
 ये अन्तरिक्षं पृथिवीं क्षियन्ति । ते नस्सर्पासो हवमागमिष्ठाः ।
 ये रोचने सूर्यस्यापि सर्पाः । ये दिवं देवीमनुसञ्चरन्ति ।
 येषामश्रेषा अनुयन्ति कामम् । तेभ्यस्सर्पेभ्यो मधुमज्जुहोमि ॥
 उपहृताः पितरो ये मघासु । मनोजवसस्सुकृतस्सुकृत्याः ।
 ते नो नक्षत्रे हवमागमिष्ठाः । स्वधाबिर्यज्ञं प्रयतं जुषन्ताम् ।
 ये अग्निदग्धा येऽनग्निदग्धाः । येऽमुल्लोकं पितरः क्षियन्ति ।
 याश्च विद्ययाः उ च न प्रविद्य । मघासु यज्ञं सुकृतम् जुषन्ताम् ॥
 गवां पतिः फल्गुनीनामसि त्वम् । तदर्यमन् वरुणमित्र चारु ।
 तं त्वा वयः सन्तारः सनीनाम् । जीवा जीवन्तमुप संविशेम ।
 येनेमा विश्वा भुवनानि सञ्जिता । यस्य देवा अनुसंयन्ति चेतः ।
 अर्यमा राजाऽजरस्तु विष्मान् । फल्गुनीनामृषभो रोरवीति ॥
 श्रेष्ठो देवानां भगवो भगासि । तत्त्वा विधुः फल्गुनीस्तस्य वित्तात् ।
 अस्मभ्यं क्षत्रमजरः सुवीर्यम् । गोमदश्चवदुपसन्नुदेह ।
 भगोह दाता भग इत्प्रदाता । भगो देवीः फल्गुनीराविवेश ।
 भगस्येत्तं प्रसवं गमेम । यत्र देवैस्सधमादं मदेम ॥
 आयातु देवस्सवितोपयातु । हिरण्ययेन सुवृता रथेन ।
 वहन् हस्तः सुभः विद्वनापसम् । प्रयच्छन्तं पपुर्णि पुण्यमच्छ ।
 हस्तः प्रयच्छ त्वमृतं वसीयः । दक्षिणेन प्रतिगृभ्णीम एनत् ।
 दातारमद्य सविता विदेय । यो नो हस्ताय प्रसुवाति यज्ञम् ॥
 त्वष्टा नक्षत्रमभ्येति चित्राम् । सुभः संसंयुवतिः रोचमानाम् ।
 निवेशयन्नमृतान्मर्त्याश्च । रूपाणि पिशन् भुवनानि विश्वा ।
 तन्नस्त्वष्टा तदु चित्रा विचष्टाम् । तन्नक्षत्रं भूरिदा अस्तु मह्यम् ।
 तन्नः प्रजां वीरवतीं सनोतु । गोभिर्नो अश्वैस्समनक्तु यज्ञम् ॥
 वायुर्नक्षत्रमभ्येति निष्ण्याम् । तिमशृङ्गो वृषभो रोरुवाणः ।

समीरयन् भुवना मातरिश्वा । अपद्वेषांसि नुदतामरातीः ।
 तन्नो वायस्तदु निष्या शृणोतु । तन्नक्षत्रं भूरिदा अस्तु मह्यम् ।
 तन्नो देवासो अनुजानन्तु कामम् । यथा तरेम दुरितानि विश्वा ॥
 दूरमस्मच्छत्रवो यन्तु भीताः । तदिन्द्राग्नी कृणुताम् तद्विशखे ।
 तन्नो देवा अनुमदन्तु यज्ञम् । पश्चात् पुरस्तादभयन्नो अस्तु ।
 नक्षत्राणामधिपत्नी विशखे । श्रेष्ठाविन्द्राग्नी भुवनस्य गोपौ ।
 विषूचश्शत्रून्पबाधमानौ । अपक्षुधन्नुदतामरातिम् ॥
 पूर्णा पश्चादुत पूर्णा पुरस्तात् । उन्मध्यतः पौर्णमासी जिगाय ।
 तस्या देवा अधिसंवसन्तः । उत्तमे नाक इह मादयन्ताम् ।
 पृथ्वी सुवचा युवतिः सजोषा । पौर्णमास्युदगाच्छोभमाना ।
 आप्याययन्ती दुरितानि विश्वा । उरुं दुहा यजमानाय यज्ञम् ।
 ऋद्ध्यास्म हव्यैर्नमसोपसद्य । मित्रं देवं मित्रधेयं नो अस्तु ।
 अनूराधान् हविषा वर्धयन्तः । शतं जीविम शरदः सवीराः ।
 चित्रम् नक्षत्रमुदगात्पुरस्तात् । अनूराधा स इति यद्वदन्ति ।
 तन्मित्र एति पथिभिर्देवयानैः । हिरण्ययैर्विततैरन्तरिक्षे ॥
 इन्द्रो ज्येष्ठामनु नक्षत्रमेति । यस्मिन् वृत्रं वृत्रं तूयौ ततार ।
 तस्मिन्वयममृतं दुहानाः । क्षुधन्तरेम दुरितिं दुरिष्टिम् ।
 पुरन्दराय वृषभाय धृष्णवे । अषाढाय सहमानाय मीढुषे ।
 इन्द्राय ज्येष्ठा मधुमदुहाना उरुं कृणोतु यजमानाय लोकम् ॥
 मूलं प्रजां वीरवतीं विदेय । पराच्येतु निर्ऋतिः पराचा ।
 गोभिर्नक्षत्रं पशुभिस्समक्तम् । अहर्भूयाद्यजमानाय मह्यम् ।
 अहर्नो अद्य सुविते ददातु । मूलं नक्षत्रमिति यद्वदन्ति ।
 पराचीं वाचा निर्ऋतिं नुदामि । शिवं प्रजयै शिवमस्तु मह्यम् ॥
 या दिव्या आपः पर्यसा सम्बभूवुः । या अन्तरिक्ष उत पार्थिवीर्याः ।
 यासामषाढा अनुयन्ति कामम् । ता न आपः शः स्योना भवन्तु ।
 याश्च कूप्या याश्च नादास्समुद्रियाः । याश्च वैशन्तीरुत प्रासचीर्याः ।
 यासामषाढा मधु भक्षयन्ति । ता न आपः शः स्योना भवन्तु ॥
 तन्नो विश्वे उप शृण्वन्तु देवाः । तदषाढा अभिसंयन्तु यज्ञम् ।
 तन्नक्षत्रं प्रथतां पशुभ्यः । कृषिर्वृष्टिर्यजमानाय कल्पताम् ।
 शुभ्राः कन्या युवतयस्सुपेशसः । कर्मकृतस्सुकृतो वीर्यावतीः ।
 विश्वान् देवान् हविषा वर्धयन्तीः । अषाढाः काममुपायन्तु यज्ञम् ॥
 यस्मिन् ब्रह्माभ्यजयत्सर्वमितत् । अमुञ्च लोकमिदमूच सर्वम् ।
 तन्नो नक्षत्रमभिजिद्विजित्य । श्रियं दधात्वहणीयमानम् ।
 उभौ लोकौ ब्रह्मणा सज्जितौ । तन्नो नक्षत्रमभिजिद्विचष्टाम् ।
 तस्मिन्वयं पृतनास्सज्जयेम । तन्नो देवासो अनुजानन्तु कामम् ॥
 शृण्वन्ति श्रोणामृतस्य गोपाम् । पुण्यामस्या उपशृणोमि वाचम् ।

म॒हीं दे॒वीं विष्णु॑पत्नीम॒जूर्या॑म् । प्र॒तीची॑ मे॒नाः ह॒विषा॑ य॒जामः॑ ।
 त्रेधा॑ विष्णु॑रु॒रुगा॑यो वि॒च॒क्रमे॑ । म॒हीं दि॒वं पृथि॑वीम॒न्तरि॑क्षम् ।
 तच्छ्रो॑णैति॒श्रव॑ इच्छ॒माना॑ । पु॒ण्यं श्लो॒कं यज॑मानाय कृ॒ण्वती॑ ॥
 अ॒ष्टौ दे॒वा वस॑वस्सो॒म्यासः॑ । च॒तस्रो॑ दे॒वीर॒जराः॑ श्रवि॒ष्ठाः ।
 ते य॒ज्ञं पा॑न्तु रज॑सः पु॒रस्ता॑त् । स॒वत्स॑रीणम॒मृत॑स्व॒स्ति ।
 य॒ज्ञं नः॑ पा॒न्तु वस॑वः पु॒रस्ता॑त् । दक्षि॑णतोऽभिय॑न्तु श्रवि॒ष्ठाः ।
 पु॒ण्यन्न॑क्षत्रम॒भि संवि॑शाम । मा नो अ॒राति॑र॒घश॑साऽग॒न्त॑ ॥
 क्षत्र॑स्य राजा वरु॑णोऽधि॒राजः॑ । नक्ष॑त्राणां शतभि॑षवसिष्ठः ।
 तौ दे॒वेभ्यः॑ कृ॒णुति॑ दी॒र्घमा॑युः । शत॑ सहस्रा॑ भेष॒जानि॑ धत्तः ।
 य॒ज्ञो राजा॑ वरु॑ण उ॒पया॑तु । तन्नो॑ वि॒श्वे अ॒भि संय॑न्तु दे॒वाः ।
 तन्नो॑ नक्ष॑त्रं शतभि॑षग॒जुषा॑णम् । दी॒र्घमा॑युः प्र॒तिर॑द्भेष॒जानि॑ ॥
 अ॒ज एक॑पा॒दुद॑गात्पु॒रस्ता॑त् । वि॒श्वो भू॒तानि॑ प्र॒ति मो॑द॒मानः॑ ।
 तस्य॑ दे॒वाः प्र॑स॒वं य॑न्ति स॒र्वे । प्रो॒ष्ठप॑दासो॒ अमृत॑स्य गो॒पाः ।
 वि॒भ्राज॑मानस्समि॒धा न उ॒ग्रः । आ॒न्तरि॑क्षमरु॒हद॑ग॒न्द्याम् ।
 तं सूर्य॑ दे॒वम॑जमेक॒पाद॑म् । प्रो॒ष्ठप॑दासो अ॒नुय॑न्ति स॒र्वे ॥
 अहि॑र्बु॒ध्नियः॑ प्रथ॒मा न ए॒ति । श्रेष्ठो॑ दे॒वाना॑मु॒त मा॑नु॒षाणा॑म् ।
 तं ब्रा॑ह्म॒णास्सो॒मपा॑स्सो॒म्यासः॑ । प्रो॒ष्ठप॑दासो॒ अभि॑रक्षन्ति स॒र्वे ।
 च॒त्वार॑ एक॒मभि॑ कर्म॒ देवाः॑ । प्रो॒ष्ठप॑दा स इति॑ या॒न् वद॑न्ति ।
 ते बु॒ध्नियं॑ परि॒षद्य॑ स्तु॒वन्तः॑ । अहि॑र॒क्षन्ति॑ नम॒सोप॑सद्य॑ ॥
 पू॒षा रे॒वत्य॑न्वेति॒ पन्था॑म् । पु॒ष्टिप॑ती पशु॒पा वा॒जब॑स्त्यौ ।
 इ॒मानि॑ ह॒व्या प्र॑य॒ता जु॑षा॒णा । सु॒गैर्नो॑ या॒नैरु॑प॒याता॑ य॒ज्ञम् ।
 क्षु॒द्रान् प॑शून् रक्ष॒तु रे॒वती॑ नः । गा॒वो नो॑ अ॒श्वाः अ॒न्वेतु॑ पू॒षा ।
 अ॒न्नं रक्ष॑न्तौ बहु॒दा वि॑रू॒पम् । वा॒जः स॑नु॒तां यज॑मानाय य॒ज्ञम् ॥
 तद॑श्चि॒नावि॑श्वयु॒जोप॑या॒ताम् । शु॒भङ्ग॑मि॒ष्टौ सु॑यमे॒भिर॑श्चैः ।
 स्वं नक्ष॑त्रं ह॒विषा॑ यज॑न्तौ । म॒ध्वास॑म्पृ॒क्तौ य॒जुषा॑ सम॒क्तौ ।
 यौ दे॒वाना॑ भि॒षजौ॑ ह॒व्यवा॑हौ । वि॒श्वस्य॑ दू॒तव॑मृत॒स्य गो॑पौ ।
 तौ नक्ष॑त्रं जु॒जुषा॑णोप॒याता॑म् । नमो॑ऽश्चि॒भ्यां कृ॑णुमोऽश्च॒युग्भ्या॑म् ॥
 अप॑ पा॒प्मानं॑ भ॒रणी॑र्भरन्तु । तद्य॑मो राजा॒ भग॑वान् वि॒च॒ष्टाम् ।
 लो॒कस्य॑ राजा॒ मह॑तो॒ महान्॑ हि । सु॒गं नः॑ पन्था॒मभ॑यं कृ॒णोतु॑ ।
 यस्मि॑न्नक्ष॒त्रे यम॑ एति॒ राजा॑ । यस्मि॑न्ने॒नम॑भ्यर्षि॒चन्त॑ दे॒वाः ।
 तद॑स्य चि॒त्रं ह॒विषा॑ य॒जाम । अप॑ पा॒प्मानं॑ भ॒रणी॑र्भरन्तु ॥

नि॒वेश॑नी स॒ङ्गम॑नी॒ वसू॑नां वि॒श्वो रू॒पाणि॑ वसू॒न्यावे॑शय॒न्ती ।
 स॒हस्र॑पोष॒ सुभ॑गा ररा॒णा सा न॑ आ॒गन्व॑र्चसा संवि॒दाना॑ ॥
 यत्ते॑ दे॒वा अ॒दधु॑र्भा॒गधे॑यममा॒वास्ये॑ संव॒सन्तो॑ म॒हित्वा॑ ।
 सा नो॑ य॒ज्ञं पि॑पृ॒हि वि॒श्ववा॑रे र॒यिन्नो॑ धेहि सु॒भगे॑ सु॒वीर॑म् ॥

नवो॑ नवो भवति जायमानोऽह्ना॑ केतु॒रुष॑सामेत्यग्रे॑ ।
भा॒गं दे॒वेभ्यो॑ वि॒दधा॑त्यायन् प्र॒चन्द्र॑मास्तिरिति दी॒र्घमायुः॑ ॥
यमा॑दित्या अ॒शुमा॑प्याययन्ति यमक्षि॑तमक्षि॒तयः॑ पिबन्ति ।
तेन॑ नो राजा वरु॑णो बृह॒स्पति॑राप्याययन्तु भुव॑नस्य गो॒पाः ॥

ये वि॒रूपे॑ सम॑नसा सं॒व्यय॑न्ती । सम॑नं तन्तुं॑ परि॒तात॑नाते ।
वि॒भू प्र॒भू अनु॑भू वि॒श्वतो॑ हुवे । ते नो॑ नक्ष॒त्रे ह॒वम॑गमेतम् ।
व्यं दे॒वी ब्र॒ह्मणा॑ संवि॒दानाः॑ । सुर॑त्नासो दे॒ववी॑तिं दधा॒नाः ।
अ॒होरा॑त्रे ह॒विषा॑ वर्ध॑यन्तः । अति॑ पा॒प्मान॑मतिमु॒क्त्याग॑मेम ।
प्रत्यु॑वद॒श्याय॑ती । व्यु॒च्छन्ती॑ दुहि॒ता दि॒वः ।
अ॒पो म॒ही वृ॑णुते चक्षु॑षा । तमो॑ ज्योतिष्कृ॒णोति॑ सून॒री ।
उ॒दुस्त्रि॑यास्सच॒ते सूर्यः॑ । स चा॑ उ॒द्यन्न॑क्षत्रमर्चि॒मत् ।
तवे॑दुषो व्यु॒षि सूर्य॑स्य च । संभ॑क्तेन गमेमहि ।
तन्नो॑ नक्षत्रमर्चि॒मत् । भानु॑मत्तेज॑ उ॒च्चर॑त् ।
उप॑य॒ज्ञमि॒हाग॑मत् ।
प्र॒नक्ष॑त्रायदे॒वाय॑ । इन्द्रा॒येन्दुः॑ हवामहे ।
स नः॑ सवि॒ता सु॑वत्स॒निम् । पु॒ष्टिदा॑ वी॒रव॑त्तमम् ।
उ॒दृत्यं॑ जा॒तवे॑दसं दे॒वं वह॑न्ति के॒तवः॑ । दृ॒शे वि॒श्वाय॑ सूर्य॒म् ।
चि॒त्रं दे॒वाना॑मु॒दगा॑दनीकं चक्षु॑मित्रस्य वरु॑णस्या॒ग्नेः ।
आ॒ऽप्रा॒द्यावा॑ पृथि॒वी अ॒न्तरि॑क्षं सूर्य॑ आ॒त्मा जग॑तस्त॒स्थुष॑श्च ।
आदि॑तिर्न उरु॒ष्यत्व॑दि॒तिः शर्म॑ यच्छतु । अदि॑तिः पा॒त्वह॑सः ।
म॒हीमू॒षु मा॒तर॑ सु॒व्रता॑नामु॒तस्य॑ पत्नीमवसे हुवेम ।
तुवि॑क्षत्राम॒जर॑न्तीमु॒रुचीः॑ सु॒शमा॑णमदि॒तिः सु॒प्रणी॑तम् ।
इ॒दं वि॒ष्णुर्वि॑चक्रमे त्रेधा नि॒दधे॑ प॒दम् । समू॑ढमस्य पा॒सुरे॑ ।
प्र॒तद्वि॒ष्णुस्त्व॑वते वी॒र्या॑य । मृ॒गो न भी॑मः कु॒चरो॑ गि॒रिष्ठाः॑ ।
यस्यो॑रुषु॑ त्रिषु वि॒क्रम॑णेषु । अधि॑क्षियन्ति भुव॑नानि वि॒श्वा ।
अ॒ग्निर्मूर्धा॑ दि॒वः क॒कुत्प॑तिः पृथि॒व्या अ॒यम् । अ॒पाः रेता॑सि जिन्वति ।
भुवो॑ य॒ज्ञस्य॑ रज॒सश्च॑ ने॒ता यत्रा॑नियु॒द्धिः सच॑से शि॒वाभिः॑ ।
दि॒वि मूर्धा॑नं दधि॒षे सु॒वषा॑ जि॒ह्वाग्ने॑ चकृ॒षे ह॒व्यवा॑हम् ।
अनु॑नोऽद्यानु॒मतिर्य॑ज्ञं दे॒वेषु॑ मन्यताम् ।
अ॒ग्निश्च॑ ह॒व्यवा॑हनो भव॑तां दा॒शुषे॑ मयः ।
अ॒न्विद॑नुमते त्वं म॒न्यासै॑ श॒च कृ॑धि ।
क्र॒त्वे द॑क्षाअ॒य नो॒हि नु॑ प्र॒ण आ॒यूषि॑ तारिषः ।
ह॒व्यवा॑हमभिमाति॒षाह॑म् । र॒क्षो॒हणं॑ पृ॒तना॑सु जि॒ष्णुम् ।
ज्योति॑ष्मन्तं दी॒द्यतं॑ पु॒रन्धि॑म् । अ॒ग्निः स्व॑ष्टृ॒कृत॑ माहुवेम ।

स्विष्टमग्ने अभितत्पृणाहि । विश्वा देव पृतना अभिष्य ।
उरुन्नः पन्थां प्रदिशन्विभाहि । ज्योतिष्मद्वेह्यजरन्न आयुः ॥

अ॒ग्नये॒ स्वाहा॑ कृ॒त्तिका॒भ्यः॒ स्वाहा॑ ।
अ॒म्बायै॒ स्वाहा॑ दु॒लायै॒ स्वाहा॑ ।
नि॒तन्त्यै॒ स्वाहा॑ऽभ्र॒यन्तै॒ स्वाहा॑ ।
मे॒घय॑न्त्यै॒ स्वाहा॑ व॒र्षय॑न्त्यै॒ स्वाहा॑ ।
चु॒पु॒णिका॑यै॒ स्वाहा॑ ।
प्र॒जाप॑तये॒ स्वाहा॑ रो॒हिण्यै॒ स्वाहा॑ ।
रोच॑मानायै॒ स्वाहा॑ प्र॒जाभ्यः॒ स्वाहा॑ ।
सोमा॑य॒ स्वाहा॑ मृ॒गशी॑र्षाय॒ स्वाहा॑ ।
इ॒न्वका॒भ्यः॒ स्वाहा॑ शै॒षधी॑भ्यः॒ स्वाहा॑ ।
रा॒ज्याय॒ स्वाहा॑ऽभि॒जित्यै॒ स्वाहा॑ ।
रु॒द्राय॒ स्वाहा॑ऽऽ॒र्द्रायै॒ स्वाहा॑ ।
पि॒न्वमा॑नायै॒ स्वाहा॑ प॒शुभ्यः॒ स्वाहा॑ ।
अ॒दित्यै॒ स्वाहा॑ पु॒नर्व॑सुभ्याम् ।
स्वाहा॑ भू॒त्यै॒ स्वाहा॑ प्र॒जात्यै॒ स्वाहा॑ ।
बृ॒हस्प॑तये॒ स्वाहा॑ ति॒ष्याय॒ स्वाहा॑ ।
ब्र॒ह्मव॑र्चसाय॒ स्वाहा॑ ।
स॒र्पेभ्यः॒ स्वाहा॑ऽऽश्रे॒षाभ्यः॒ स्वाहा॑ ।
द॒न्तशू॑केभ्यः॒ स्वाहा॑ ।
पि॒तृभ्यः॒ स्वाहा॑ म॒घाभ्यः॑ ।
स्वाहा॑ऽन॒घाभ्यः॒ स्वाहा॑ऽग॒दाभ्यः॑ ।
स्वाहा॑ऽरु॒न्धती॑भ्यः॒ स्वाहा॑ ।
अ॒र्य॒म्णे स्वाहा॑ फ॒ल्गुनी॑भ्याः॒ स्वाहा॑ ।
प॒शुभ्यः॒ स्वाहा॑ ।
भ॒गाय॒ स्वाहा॑ फ॒ल्गुनी॑भ्याः॒ स्वाहा॑ ।
श्रे॒ष्ठाया॑य॒ स्वाहा॑ ।
स॒वि॒त्रेस्वाहा॑ ह॒स्ताय॑ ।
स्वाहा॑ द॒दते॒ स्वाहा॑ पृ॒णते॑ ।
स्वाहा॑ प्र॒यच्छ॑ते॒ स्वाहा॑ प्र॒तिगृ॑भ्णते॒ स्वाहा॑ ।
त्व॒ष्ट्रे स्वाहा॑ चि॒त्रायै॒ स्वाहा॑ ।
चै॒त्राय॒ स्वाहा॑ प्र॒जायै॒ स्वाहा॑ ।
वा॒यवे॒ स्वाहा॑ नि॒ष्यायै॒ स्वाहा॑ ।
का॒म॒चा॒राय॒ स्वाहा॑ऽभि॒जित्यै॒ स्वाहा॑ ।
इ॒न्द्रा॒ग्निभ्याः॒ स्वाहा॑ वि॒शाखा॑भ्याः॒ स्वाहा॑ ।

स्रेष्ठयाय स्वाहाऽभिजित्यै स्वाहा ।
 पौर्णमास्यै स्वाहा कामाय स्वाहा गत्यै स्वाहा ।
 मित्राय स्वाहाऽनूराधेभ्यः स्वाहा ।
 मित्रधेयाय स्वाहाऽभिजित्यै स्वाहा ।
 इन्द्राय स्वाहा ज्येष्ठायै स्वाहा ।
 ज्येष्ठाय स्वाहाऽभिजित्यै स्वाहा ।
 प्रजापतये स्वाहा मूलाय स्वाहा ।
 प्रजायै स्वाहा ।
 अङ्गयः स्वाहाऽषाढाभ्यः स्वाहा ।
 समुद्राय स्वाहा कामाय स्वाहा ।
 अभिजित्यै स्वाहा ।
 विश्वेभ्यो देवेभ्यः स्वाहाऽषाढाभ्यः स्वाहा ।
 अनपजय्याय स्वाहा जित्यै स्वाहा ।
 ब्रह्मणे स्वाहाऽभिजिते स्वाहा ।
 ब्रह्मलोकाय स्वाहाऽभिजित्यै स्वाहा ।
 विष्णवे स्वाहा श्रोणायै स्वाहा ।
 श्लोकाय स्वाहा श्रुतायस्स्वाहा ।
 वसुभ्यः स्वाहा श्रविष्ठाभ्यः स्वाहा ।
 अग्राय स्वाहा परीत्यै स्वाहा ।
 वरुणाय स्वाहा शतभिषजे स्वाहा ।
 भेषजेभ्यः स्वाहा ।
 अजायैकपदे स्वाहा प्रोष्ठपदेभ्यः स्वाहा ।
 तेजसे स्वाहा ब्रह्मवर्चसाय स्वाहा ।
 अहये बुधियाय स्वाहा प्रोष्ठपदेभ्यः स्वाहा ।
 पूष्णे स्वाहा रेवत्यै स्वाहा ।
 पशुभ्यः स्वाहा ।
 अश्विभ्याः स्वाहाऽश्वयुग्भ्याः स्वाहा ।
 श्रोत्राय स्वाहा श्रुत्यै स्वाहा ।
 यमाय स्वाहाऽपभरणीभ्यः स्वाहा ।
 राज्याय स्वाहाऽभिजित्यै स्वाहा ।
 अमावास्यायै स्वाहा कामाय स्वाहा गत्यै स्वाहा ।
 चन्द्रमसे स्वाहा प्रतीदृश्यायै स्वाहा ।
 अहोरात्रेभ्यः स्वाहाऽर्धमासेभ्यः स्वाहा ।
 मासेभ्यः स्वाहर्तुभ्यः स्वाहा ।
 संवत्सराय स्वाहा ।
 अह्ने स्वाहा रात्र्यै स्वाहा ।

अतिमुक्त्यै स्वाहा ।
 उषसे स्वाहा व्युष्ट्यै स्वाहा ।
 व्यूष्यै स्वाहा व्युच्छन्त्यै स्वाहा ।
 व्युष्टायै स्वाहा ।
 नक्षत्राय स्वाहोदिष्यते स्वाहा ।
 उद्यते स्वाहोदिताय स्वाहा ।
 हरसे स्वाहा भरसे स्वाहा ।
 भ्राजसे स्वाहा तेजसे स्वाहा ।
 तपसे स्वाहा ब्रह्मवर्चसाय स्वाहा ।
 सूर्याय स्वाहा नक्षत्रेभ्यः स्वाहा ।
 प्रतिष्ठायै स्वाहा ।
 आदित्यै स्वाहा प्रतिष्ठायै स्वाहा ।
 विष्णवे स्वाहा यज्ञाय स्वाहा ।
 प्रतिष्ठायै स्वाहा ॥

दधि॒क्रावि॒ण्णो॑ अ॒कारि॒षं जि॒ष्णो॒रश्व॑स्य वा॒जिनः॑ ।
 सु॒रभि॑ नो मु॒खाक॑रत् प्र॒ण आयू॑षि ता॒रिषत् ॥
 आपो॑हि॒ष्ठा म॑यो भुव॒स्तान॑ ऊ॒र्जे द॑धातन । म॒हेर॑णाय चक्ष॒से ॥
 योवः॑ शि॒वत॑मो र॒सस्त॑स्य भाजय॒तेहनः॑ । उ॒शती॑रिव मा॒तरः॑ ॥
 तस्मा॒ अर॑ ग॒माम॑ वो यस्य॒ क्षया॑यि जिन्व॑थ । आपो॑ ज॒नय॑था च नः ॥

उदु॑त्तमं वरु॒णपा॑शम॒स्मद॑वा॒धमं वि॒मध्य॑मः श्र॒धाय॑ ।
 अथा॑ व॒यमा॑दित्य॒व्रते॑ त॒वाना॑गि॒सो अ॑दि॒तये॑ स्याम ।
 अस्त॑भ्नाद् द्यामृ॒षभो॑ अ॒न्तरि॑क्षममि॒मीत॑ वरि॒माणं॑ पृथि॒व्या
 आसी॑दद्वि॒श्वा भुव॑नानि स॒म्राड्वि॒श्वेत्त॑नि वरु॒णस्य॑ व्र॒तानि॑ ।
 यत्किञ्चे॒दम् वरु॑ण॒दैव्यै॑ जने॒ऽभिद्रो॑हं म॒नुष्या॑श्च॒राम॑सि ।
 अचि॑त्तीय॒त्तव॑ ध॒र्मा यु॒योपि॑ मा न॒स्तस्मा॑देन॒सो दे॒व री॑रिषः ॥
 कि॒तवा॑सो यद्वि॒रिपु॑नं दी॒वि यद्वा॑घा स॒त्यमु॑तयन्न वि॒स्र ।
 सर्वा॑ ता वि॒ष्य शि॒थिरे॒व दे॒वथा॑ ते स्याम वरु॒णप्रि॑यासः ॥
 अ॒व ते॑ हे॒डो वरु॑ण नमो॒भिर॑व॒यज्ञे॒भिरी॑महे ह॒विर्भिः॑ ।
 क्षय॑न्न॒सम॑भ्यम॒सुर॑प्रचेतो राज॒न्नेना॑सि॒शिश्र॑थः कृ॒तानि॑ ॥
 तत्त्वा॑यामि ब्रह्म॒णा व॑न्द॒मान॑स्तदाशा॒स्ते यज॑मानो ह॒विर्भिः॑ ।
 अहे॑डमानो वरु॒णेह॑ बो॒ध्युरु॑शः स मा न॒ आयुः॑ प्रमो॒षीः ॥

हि॒रण्य॑वर्णाः शुच॑यः पा॒वका॑ यासु॒ जातः॑ क॒श्यपो॑ यास्वि॒न्द्रः ।
 अ॒ग्निं या॑ ग॒र्भम् द॑धिरे विरू॒पास्तान॑ आ॒प॒शः स्यो॒ना भ॑वन्तु ॥

यासां॑ राजा॑ वरुणो॑ याति॑ मध्ये॑ सत्या॑नृते अव॑पश्य॑न् जनाना॑म् ।
मधु॑श्चुत॑श्शुच॑यो याः पा॑वकास्ता न॒ आप॑श्शः॑ स्यो॒ना भव॑न्तु ॥
यासा॑म् दे॒वा दि॒वि कृ॑ण्वन्ति॑ भ॒क्षं या अ॒न्तरि॑क्षे बहु॒धा भव॑न्ति ।
याः पृ॑थि॒वीम् पय॑सो॒न्दन्ति॑ शु॒क्रास्ता न॒ आप॑श्शः॑ स्यो॒ना भव॑न्तु ॥
शि॒वेन॑ मा चक्षु॑षा पश्य॑ताप॒श्शिव॑या त॒नुवो॑प॒ स्पृश॑त॒ त्वच॑म् मे ।
सर्वा॑ः अ॒ग्नीः र॑प्सुषदो॑ हुवो वो मयि॑ वचो॑ बल॒मोजो॑ निध॑त्त ॥

पव॑मान॒स्सुव॑र्जनः । प॒वित्रे॑ण विच॑र्षणिः ।
यः पो॒ता स पु॑नातु मा । पु॒नन्तु॑ मा दे॒वज॑नाः ।
पु॒नन्तु॑ मन॑वो धि॒या । पु॒नन्तु॑ वि॒श्व आ॑यवः ।
जा॒तव॑दः प॒वित्रे॑वत् । प॒वित्रे॑ण पु॒नाहि॑ मा ।
शु॒क्रेण॑ दे॒वदी॑द्यत् । अ॒ग्ने क्र॑त्वा क्र॒तू र॑नु ।
यत्ते॑ प॒वित्र॑म॒र्चिषि॑ । अ॒ग्ने वि॑त॒तम॑न्तरा ।
ब्र॒ह्म ते॑न॒ पुनी॑महे । उ॒भाभ्या॑ दे॒वस॑वितः ।
प॒वित्रे॑ण स॒वेन॑ च । इ॒दं ब्र॒ह्म पु॑नीमहे ।
वै॒श्वदे॒वी पु॑नती दे॒व्यागा॑त् । य॒स्यै ब॒ह्वी॒स्तनु॑वो वी॒तपृ॑ष्ठाः ।
तया॑ म॒दन्तः स॒धमा॑द्येषु । व॒यः स्या॑म॒ पत॑यो र॒यीणा॑म् ।
वै॒श्वान॒रो र॒श्मिभि॑र्मा पु॒नातु॑ । वा॒तः प्रा॑णेने॒षिरो म॑यो भूः ।
ध्या॒वापृ॑थि॒वी प॑यसा प॒योभिः॑ । ऋ॒ताव॑री य॒ज्ञिये॑ मा पु॒नीता॑म् ।
बृ॒हद्भिः॑ स॒वित॑स्तृ॒भिः । व॒र्षिष्टे॑दे॒वम॑न्म॒भिः ।
अ॒ग्ने दक्षैः॑ पु॒नाहि॑ मा । येन॑ दे॒वा अपु॑नत ।
येना॑पो दि॒व्यं क॑शः । तेन॑ दि॒व्येन॑ ब्र॒ह्मणा॑ ।
इ॒दं ब्र॒ह्म पु॑नीमहे । यः पा॑वमा॒नीर॑ध्येति ।
ऋ॒षिभि॑स्स॒म्भृत॑ र॒सम् । स॒र्वं स॒ पूत॑म॒श्नाति॑ ।
स्व॒दित॑म् मा॒तरि॑श्व॒ना । पा॑वमा॒नीर्यो अ॑ध्येति ।
ऋ॒षिभि॑स्स॒म्भृत॑ र॒सम् । त॒स्मै सर॑स्वती दु॒हे ।
क्षी॒रः सर्पि॑र्मधू॒दक॑म् । पा॑वमा॒नीस्स्व॑स्त्य॒नीः ।
सु॒दुघा॑हि प॒यस्व॑तीः । ऋ॒षिभि॑स्स॒म्भृतो॑ र॒सः ।
ब्रा॒ह्मणे॑ष्व॒मृतः॑ ह॒ितम् । पा॑वमा॒नीदि॑शन्तु नः ।
इ॒मं लो॒कम॑थो अ॒मुम् । का॒मान्ध॑सम॒र्धय॑न्तु नः ।
दे॒वीदे॒वैः स॒माभृ॑ताः । पा॑वमा॒नीस्स्व॑स्त्य॒नीः ।
सु॒दुघा॑हि घृ॒तश्चु॑तः । ऋ॒षिभि॑स्स॒म्भृतो॑ र॒सः ।
ब्रा॒ह्मणे॑ष्व॒मृतः॑ ह॒ितम् । येन॑ दे॒वाः प॒वित्रे॑ण ।
आ॒त्मानं॑ पु॒नते॑ सदा॑ । तेन॑ स॒हस्र॑धा॒रेण॑ ।
पा॑वमा॒न्यः पु॑नन्तु मा । प्रा॒जाप॑त्यम् प॒वित्र॑म् ।
श॒तो॒ध्यामः॑ हि॒र॒ण्यम॑यम् । तेन॑ ब्र॒ह्म वि॑दो व॒यम् ।

पु॒तं ब्र॒ह्म पु॒नीम॑हे । इन्द्र॑स्सु॒नीती स॒हमा पु॒नातु ।
सोम॑स्स्व॒स्त्या वरु॑णस्समी॒च्या । यमो॑ र॒जा प्र॑मृ॒णाभिः पु॒नातु मा ।
जा॒तवे॑दा मो॒र्जय॑न्त्या पु॒नातु । भूर्भुव॑स्सुवः ।

तच्छृ॑ं योरावृ॒णीम॑हे । गा॒तुं य॒ज्ञाय॑ ।
गा॒तुं य॒ज्ञप॑तये । दैवी॑स्स्व॒स्तिर॑स्तु नः ।
स्व॒स्तिर्मानु॑षेभ्यः । ऊ॒र्ध्वं जि॑गातु भेष॒जम् ।
शन्नो॑ अस्तु द्वि॒पदे॑ । शं चतु॑ष्पदे ।
ॐ शान्ति॑श्शान्ति॑श्शान्तिः॑ ।

नमो॑ ब्रह्म॒णि नमो॑ अस्त्व॒ग्नये॑ नमः॑ पृथि॒व्यै नम॑ ओष॒धीभ्यः॑ ।
नमो॑ वा॒चे नमो॑ वा॒चस्प॑तये विष्णवे बृ॒हते॑ करोमि ॥
ॐ शान्ति॑श्शान्ति॑श्शान्तिः॑ ।

॥ प्रोक्षण मन्त्राः ॥

आपो॑हि॒ष्ठा म॑यो भुव॒स्तान ऊ॒र्जे द॑धातन । म॒हेर॑णाय चक्ष॒से ॥
योवः॑ शि॒वत॑मो र॒सस्त॑स्य भाजय॒तेहनः॑ । उ॒शती॑रिव मा॒तरः॑ ॥
तस्मा॑ अरं॒ गमा॑म वो॒ यस्य॑ क्षयायि जिन्व॒थ । आपो॑ ज॒नय॑था च नः ॥

देव॑स्य॒ त्वा स॒वितुः॑ प्र॒सवे॑ । अ॒श्विनो॑र्बा॒हुभ्या॑म् । पू॒ष्णो ह॒स्ताभ्या॑म् ।
अ॒श्विनो॑र्भैष॒ज्येन॑ । तेज॑से ब्रह्मव॒र्चसा॑याभिषि॒ञ्चामि॑ ॥
देव॑स्य॒ त्वा स॒वितुः॑ प्र॒सवे॑ । अ॒श्विनो॑र्बा॒हुभ्या॑म् । पू॒ष्णो ह॒स्ताभ्या॑म् ।
सर॑स्वत्यै भैष॒ज्येन॑ । वी॒र्या॑यान्नाद्या॒याभिषि॑ञ्चामि ॥
देव॑स्य॒ त्वा स॒वितुः॑ प्र॒सवे॑ । अ॒श्विनो॑र्बा॒हुभ्या॑म् । पू॒ष्णो ह॒स्ताभ्या॑म् ।
इन्द्र॑स्येन्द्रि॒येण॑ । श्रिये॑ यश॒से ब॒लाया॑भिषि॒ञ्चामि॑ ॥

देव॑स्य॒ त्वा स॒वितुः॑ प्र॒सवे॑ ऽश्विनो॑र्बा॒हुभ्या॑म् पू॒ष्णो ह॒स्ताभ्या॑म्
सर॑स्वत्यै वा॒चो य॒न्तुय॑न्त्रेणा॒ग्नेस्त्वा॑ सा॒म्राज्ये॑नभिषि॒ञ्चामि॑ ॥
देव॑स्य॒ त्वा स॒वितुः॑ प्र॒सवे॑ ऽश्विनो॑र्बा॒हुभ्या॑म् पू॒ष्णो ह॒स्ताभ्या॑म्
सर॑स्वत्यै वा॒चो य॒न्तुय॑न्त्रेण बृ॒हस्प॑ते॒स्त्वा सा॒म्राज्ये॑नभिषि॒ञ्चामि॑ ॥

द्रु॒पदा॑दि॒व मु॒ञ्चतु॑ । द्रु॒पदा॑दि॒वेन्मु॒मुचा॑नः ।
स्वि॒न्नः स्ना॒त्वी म॒लादि॑व । पू॒तं प॒वित्रे॑णवा॒ज्यम् ।
आप॑श्शुन्धन्तु मै॒नसः॑ ।

आपो वा इदं सर्वं विश्वा भूतान्यापः प्राणा वा आपः
पशव आपोऽन्नमापोऽमृतमापः सम्राडापो विराडापः
स्वराडापश्छन्दास्यापो ज्योतीष्यापो
यजूष्यापस्सत्यमापस्सर्वा देवता आपो
भूर्भुवस्सुवराप ओं ॥

॥ उदकशान्ति - मन्त्रपाठः समाप्तः ॥

Encoded with Accents by Rajagopal Iyer rajsand at yahoo.com
Proofread by Rajagopal and Krishnan rkiyengar at gmail.com

Please send corrections to sanskrit@cheerful.com
Last updated July 20, 2014
From <http://sanskritdocuments.org> .

The text is prepared by volunteers and is to be used for personal study
and research. The file is not to be copied or reposted for promotion
of any website or individuals or commercial purpose without permission.